

ASO LULU, 13 MATI 2024

Na nofoia e le Fofoga Fetalai le Nofoa i le itula e 9:32 i le taeao.

FOFOGA FETALAI: Ou te faasilasila atu ua amatalia nei Tualumaga a le Fono Aoao Faitulafono.

Ou te faatalofa atu i lenei taeao fou i le paia o le Palemene, i le afio o lau Afioga i le Taitai o le Malo lau Afioga i le Tamaitai Palemia. Afio lau Afioga i le Sui Palemia, afifio a outou Afioga i Minisita o le Kapeneta faapea foi a outou Afioga i Minisita Lagolago.

Afio lau Afioga i le Taitai o le Itu Agai aemaise foi o Sui Usufono uma o le tatou Palemene.

Faafetai i le Atua i Lana tausiga alofa ua malutia ai le soifua o le tatou Palemene, lea ua tatou toe fesilafai ai i le manuia mo le faaauauina o le tatou galuega. Malo le soifua manuia ma le lagi e mama.

E iai foi nisi o sui usufono mamalu ua tatou le mafuta i lenei taeao ona o nisi o faamoemoega taua ua faanoi mai ai ae maualuga lava le taofi o lo o agalelei pea le Alii i ala uma. Ia manatua pea ia tatou tatalo e malutia ai lo latou soifua i le ulufafo ma le ulufale.

Ou te faatalofa atu foi i le afifio mai o Ofisa Sili o Pulega o Matagaluega ma Faalapotopotoga Tumaoti a le tatou Malo, faamalo le onosai, malo le usu i lenei taeao.

Le silasila faafofoga mai a le atunuu i ona tulaga faalagia, e faatalofa atu lau Palemene i lenei taeao. Tapuai maia ma le manuia, tatou talosia i le alofa faasoa o le Atua le alofaiva o le tatou Maota tusa o tatou Tualumaga faaauau. Manuia tele le usugafono a le Palemene i lenei aso, ia manuia foi le tapuaiga a si o tatou atunuu.

ILOILOGA O LIPOTI A KOMITI FAA-PALEMENE MA TALI A LE MALO

1. P.P.2022/2023 NU.121, LIPOTI A LE KOMITI O LE VAEGA O ATINAE ESEESE I LE P.P.2021/2022 NU.5, & P.P.2021/2022 NU.31, LIPOTI FAALETAUSAGA A LE OFISA O LE PULE FAATONU MO TAUSAGA FAALETUPE 2019/2020 MA LE 2020/2021 - ILOILOGA

1.1. P.P.2023/2024 NU.20, TALI A LE MALO I LE P.P.2022/2023 NU.121

2. P.P.2022/2023 NU.118, LIPOTI A LE KOMITI O LE VAEGA O ATINAE ESEESE I LE P.P.2020/2021 NU.138, MA LE P.P.2021/2022 NU.32, LIPOTI FAALETAUSAGA A LE MATAGALUEGA O FESOOTAIGA MA FAAMATALAGA TEKONOLOSI MO TAUSAGA FAALETUPE 2019/2020 MA LE 2020/2021 - ILOILOGA

2.1. P.P.2023/2024 NU.31, TALI A LE MALO I LE P.P.2022/2023 NU.118

3. P.P.2023/2024 NU.5, LIPOTI A LE KOMITI O TUPE MAUA MA TUPE TOTOGI I LE P.P.2022/2023 NU.142, LIPOTI FAALETAUSAGA A LE FALEMELI O SAMOA MO LE TAUSAGA FAALETUPE 2021/2022 - ILOILOGA

3.1 P.P.2023/2024 NU.75, TALI A LE MALO I LE P.P.2023/2024 NU.5 - felafolafoaiga faaauau-aso fono 2

FOFOGA FETALAI: E tolopo Taualumaga o le aso fono ananafi o lo o saunoa le Afioga i le Taitai o le Itu Agai.

Ou te tapa lau Afioga i le Taitai o le Itu Agai mo le faaauauina o lau saunoaga.

Susuga Hon TUILAEPA FATIALOFA AUELUA SAILELE MALIELEGAOI (Taitai o le Itu Agai): Lau Afioga i le Fofoga Fetalai ou te faamalo atu e tusa ai foi o le tatou talosaga molia i le tatou Matai Sili, ae a Lona alofa ma Lona agalelei i le taitaiina mai o le Maota nei aua le tatou Fonousu.

E faamalo foi i le maleifua mai i tofaga malu o lau Afioga i le Palemia faapea Minisita o le Kapeneta ma le mamalu o sui usufono mamalu o le tatou Palemene i lena itu ma lena itu.

Faamalo atu foi i le auai mai o Ofisa Sili o Pulega o Matagaluega ma Faalapotopotoga Tumaoti a le tatou Malo, tainane le tapuaiga ma le faafogafoga mai o Le Ao Mamalu o le tatou Malo, le Sui Tofia, Faamasino Sili, ae faapea foi le paia maualuga o le tatou atunuu i ona tulaga faalupelupeina. Ia e faapea foi le faanonogamanu a auauna a le Atua.

Lau Afioga i le Fofoga Fetalai e taua tele fautuaga i Lipoti nei ua aumai i le Maota e limataitaiina ai tatou uma lava. Ae pito sili atu ona taua Lipoti nei i le Afioga i le Palemia ma le Kapeneta e latou te silafia ai foi ni mataupu e tatau ona toe faaleleia atili. Ua mafai ona avatu ai le tuualalo a Komiti eseese. O le a foi se maitau mai a Komiti, ia o le tulaga lava lena ma le faanaunautaiga o le tatou galuega e faifaatasi.

E i ai le manatu i le tulaga o le Falemeli ma le latou foi auaunaga, e i ai nai mataupu sa faatalanoaina lea e aumai i le Lipoti. O le itu taua o le latou ofisa tutotonu, tele lava le faaletonu. Pe a manatua i le tausaga e 1986, 1987 na sui mai ai i lena taimi ua tauave e le faletupe lea e i ai nei le ANZ, o le fale tonu lena o le Falemeli ae se'e atu le falemeli e tauave le nofoaga sa tu ai le Bank o Samoa sa tatau ona tu ai le ANZ e tele a latou tupe. O le fesuiaiga la lea na matua tele lava, na iloa ai i lena taimi le tele o le faaletonu o le Ofisa Tutotonu.

O lona uiga o se mataupu e taua tele ona e tatau ona toe tilotilo i ai aemaise le siosiomaga lelei e tatau ona galulue ai le aufaigaluega mo le agai i luma.

E i ai le itu tele lava lea o lo o aumai foi e latou, o le auunaga lea i Salafai. O le manatu autu e lelei ona se'e mai i i le tatou faletele o lo o i ai ma fale ia e siomia ai e fai ai le latou Ofisa. O le to'aiga lea o Savaii mai le itu i sasae ma le itu i sisifo e faafaigofie foi mo latou.

Ae o le faafitauli tele lea e aumai ua agai ina... o le manatu lea ua agai ina faalagolago tele le lalolagi i le faaaogaina o le internet ma e pei e foliga mai o manatunatuga ia mo le agai atu i le lumanai. E ono agai foi i lalo le faaaogaina o le Falemeli ma o lea foi la e maitau ai le aafia o a latou Tupe Maua.

O le taofi, e taumafai pea, taumafai pea le Falemeli aua le lotovaivai ona e faataua pea mo mea o meli e puipuia aemaise lava le lalolagi i aso nei ua matua faaoga tele e le toatele o i latou solitulafono faava-o-Malo. E i ai foi taimi latou te faaoga ai Falemeli ia ma e tatou te iloa lava le anoano o mea ia e faaoga i isi atunuu. E avatu ai e nisi foi e solitulafono ni meli e tatala loa e le tagata pa mea ia e i ai i totonu. E tatau ai ona silasila totoa le Matagaluega i auala mo le puipuga o latou, ni auala e matua faamautinoa ai o a meli e avatu i afifi e le o afifi atu ai ma ni mea e ono tatala loa ona pa lea ae faatatau mo le tagata e ana le meli ia faauma ai le ola.

O le lalolagi lea ua tatou i ai ua tele ina faulai ai soligatulafono ma e le te i te i foi faatu i Samoa nei le Ofisa...

FOFOGA FETALAI: Toe lua minute o le sui usufono.

Susuga Hon TUILAIPA FATIALOFA AUELUA SAILELE MALIELEGAOI: Faafetai... ia le ofisa e latou te mataituina soligatulafono faava-o-Malo i totonu o le Pasefika. O le tulaga la lea e taua tele le vaavaai pea ma silasila totoa i le ono faipaaga ma nisi foi Faalapotopotoga i fafo ina ia malosia pea ma ola pea lenei tautua mo le tatou atunuu.

Lau Afioga i le Fofoga Fetalai, na pau lena o si au tamai agiagi e fesoasoani ai i le galuega a le Komiti ae faapea foi ia le tatou Falemeli ma le Malo.

FOFOGA FETALAI: Malo faafetai mo le sao taua foi aua foi le agai i luma o tatou Faalapotopotoga ma tatou Matagaluega. Malo lava faafetai.

Tulai mai le sui usufono mo Vaimauga 1.

Afioga SULAMANAIA FETAIAI TAUILILI TUIVASA (Vaimauga 1): E faatalofa atu i le paia o lenei Maotai le maleifua mai foi i faguga lelei lau Afioga i le Fofoga Fetalai aemaise foi o lena talaga atoa i le afio o le Afioga i le Tamaitai Palemia ma le Kapeneta, Minisita Lagolago foi. Ia aemaise foi o le Taitai o le Itu Agai ma lenei Vaega Faaupufai, sui usufono mamalu o le Palemene. E momoli le agaga faafetai i lenei taeao.

O se manatu e avatu ona o le tulaga i le Taitaifono o Tupe i le Falemeli. E momoli le agaga faafetai a lenei Itumalo lau Afioga i le Fofoga Fetalai, e matauina lava ma le totoa le faamanuiaga foi ma le Lipoti ua tuuina mai i lenei Maota. E momoli le agaga faafetai i le Minisita aemaise foi o le Tamaitai Pule

ma le Pulega i se matatia foi na ausia i Tupe Maua a le Matagaluega i lana Lipoti lenei 2021/2022. E momoli atu ai le agaga faafetai i tupe maua, o lo o faapena ona fesoasoani foi i le tamaoaga o si o tatou atunuu.

O le fautuaga e avatu ai se agaga ona sa maua foi i le Lipoti lau Afioga i le Fofoga Fetalai, e 200 pusameli e le o toe faaaogaina. Ia o lona uiga e pei e tau masaga ma le saunoaga foi a le Taitai o le Itu Agai. E pei ua lilifa i le lē toe faaaogaina o tulaga ia i tatou pusa meli ona o le malamalama foi ua i ai ma fesootaiga. Ae o le talosaga a le Komiti o lo o tuuina mai le toe faia o ni maota i Salafai. E lagolagoina e lou sui usufono le toe faaleleia pea na o Salelologa. O le a toe faatino foi mo auaunaga i falemeli i nuu i tua, ae o lea e maua pei e 200 pusameli. O lona uiga pei e le o toe faaaogaina lea auaunaga o meli ae pei o lea e maitau i le Lipoti ua tele le auaunaga i le tulaga foi o mea o talaina o tupe i penisione a nai o tatou tagata matutua faapea foi tupe e lafo mai.

O le talosaga la a lenei itumalo e auala atu i lau Afioga i le Fofoga Fetalai i le Minisita ma le... pe le ua agavaa le tulaga i tatou Fono Faavae ina ia faapena ona e maua e pei ua lilifa lava le auaunaga i le tele o nisi ae ua tuu i mea o meli ia sa i ai. Pe le mafai ona faaoga le tatou Fono Faavae i itumalo e ave ai lava meli ia a itumalo ona tufatufa lea e aunoa ma se isi tupe e totogi ai le aufaigaluega. O le popolega o le sui usufono, o tulaga faapena e totogi le staff o lo o galulue ai.

E maitau foi ma le totoa le tulaga i le \$1 o lo o ave i nai o tatou tagata matutua, o le fautuaga foi a le Komiti o lo o i ai. Ia pei o le tatalo a lenei itumalo ia pe le mafai ona... o le alu ese mai o se vaegatupe mai le penisione a si toeaina ma le loomatua, o le \$1 e le mamafa ia tatou, ae matua mamafa lava i nai o tatou tama ma tina matutua i nai penisione. Pe le mafai ona pay mai e le NPF ia agai i le falemeli se faamanuiaga faapena, ona o lea foi e i ai le talosaga na o le sii mai le \$1 i le \$5, ae pei na pau lava le mea na o le afifio mai lava o tatou tama ma tina matutua i le penisione ave fua. O le auaunaga lena, ae toe faafoi mai totonu o le tulaga i le NPF ma tou tuutuuga na.

E pei o le agaga lena lau Afioga i le Fofoga Fetalai. E avea foi lenei itula e momoli atu ai le agaga i fusiua, meaalofa na e tuuina mai. O le maitau o ananafi na faaoga le mumu, ae po o fea o i ai se lanumoana, pei na pau lava lena o le lanu o lea e misi mai i tatou fusiua po o meaalofa ua aumai e lau Afioga i le Fofoga Fetalai i sui usufono mamalu o le Palemene. Ia manuia le Fonousu a le atunuu lau Afioga i le Fofoga Fetalai ma le mamalu o lenei Maota.

FOFOGA FETALAI: Malo faafetai mo le sao o le sui usufono mamalu. O meaalofa, ia talia ia i lenei taimi lea vaega se i oo foi i se isi taimi.

Tulai mai lau Afioga i le sui usufono mamalu mo Faleata 3.

Tofa LEALAILEPULE RIMONI AIAFI (Faleata 3): E faatalofa atu i lau Afioga i le Fofoga o le Fono aemaise le paia ma le mamalu o le Maota o Samoa, aemaise foi le faafofoga mai a le tatou atunuu. Malo le soifua maua ma le lagi e mama e tusa ai foi o lenei taeao fou. Viia le Atua.

Ae fia fai sina manatu i nai Lipoti ua tuuina mai a Komiti, malo faafetai. Manaia foi le suiga ua i ai lau Afioga, o lea pei ua tuufaatasi i sectors a tatou

Lipoti. E pau lava le popolega ona e pei o le a tilotilo i le isi Lipoti ae galo ai... aua o lea e aumai taitolu, ae le afaina. O le a fai sina manatu i nisi o Lipoti nei. O le a le oo se manatu i le Postal, ona o le Lipoti lea sa feagai ma le Komiti o Tupe lea matou te i ai. Ae fia fai sina manatu i le Lipoti a le Regulator ma le MCIT. O le mea moni lau Afioga, e tele lava finagalo ma manatu e faaalua i lenei Matagaluega, a o le mea o mautinoa, ua tele le siitaga o le tamaoaiga ma le malamalama ma le tulaga o i ai le tatou atunuu i le tulaga ma le va o le tele o atunuu o le lalolagi ona o lenei mea o le technology e pei ona tatou i ai i lenei vaitau. O le mea moni i le taimi o le Koviti-19, ana tuai tatou e le iloa pe faapefea ona taamilo le lalolagi o tatou ma le tele o atunuu, pe ana leai lenei atinae taua e mafai ai ona fesootai so o se ituaiga... i fonotaga e oo lava i aiga e oo mai lenei vaitau. O le mea lea aua tatou te tilotilo foi lea ma tatou... i lenei atinae ae ia tatou faafetai ma tatou opogi le tele ma le taua o le atinae lenei. Aisea? O le taimi lenei po o fea lava o e i ai i Samoa atoa, e mafai lava ona e talanoa i lou aiga, o lau fanau, so o se mea lava o le lalolagi ma e faalogologo mai i le tatou Fono lenei. Pei ona tatou i ai ananafi, na pe loa foi le tatou facebook, finagalo loa foi e taofi. Aisea? O le information le key. Ioe. Ae faafetai ai i le tulaga o i ai lenei atinae tele.

E taua tele le finagalo o le Afioga i le Tamaitai Palemia lea na saunoa ai i faiga faavae, fesuaiga o faiga faavae, ona o lea e maitau e i ai le fesuaiga o faiga faavae foi i le Matagaluega lenei, aemaise i le toe tuuina mai o le SNBH i lalo o le MCIT lea sa tuuina atu i tua i le CSL latou te faagaioiina. Manatua foi le CSL o le isi foi Matagaluega a le Malo. A o le CSL e operate pe galueaiina faapisinisi, o le latou lea role. O lea la ua toe finagalo le Minisita ma le Matagaluega e toe tuu mai lalo o le MCIT, ou te talitonu o le a tele ni faigata ma ni luitau e feagai ma lenei fesuaiga ua i ai. Aua e le gata ina aumai le infrastructure ae toe aumai ma tagata faigaluega. E le gata i lea, o le infrastructure ua matua, ua tataua ona toe tilotilo i se backup po o le a le tulaga e i ai. E leai se fesiligia o le taua o lenei infrastructure ia Samoa, aemaise lava i totonu o Matagaluega a le Malo ma aoga, o le intension ma le mea na aumai ai.

O le mea la lea e fia fesili atu ai i le Afioga i le Minisita po o le a se tulaga o i ai lenei fesuaiga tele o i ai. E i ai foi le tulaga i lau faalogologo i le finagalo o le Minisita, e tau tilotilo foi i le tulaga lea o le Marine Cable le Tuisamoa Cable e tau nationalize faapea e toe tuu mai i lalo o le Malo.

Manatua foi o lenei aseta, o la e own e le Malo. O shareholders o le kamupani, o le SLAC, NPF, UTOS ma le Vodafone ma le Digicel. O mafaufauga lava o lena vaitau na ala ai ona tuu i totonu le Digicel ma le Vodafone, ia log in, ia loka i totonu o le mea lenei aua e tele le investment. Aua e le mafai e tatou ona control pe pule atu i kamupani tetele nei e toe o ese ai ma lenei aseta tele ua aumai e le Malo pe a loto ai lava latou. A o le ala lea na tuu ai i totonu. Tatou te talanoa foi i le tau o le telefoni ma... O lau tala ia te outou, o le matua taugofie lava. I lou lea talitonuga. E moni pe a tatou vaavaai i isi a o totonu lava ia o le Pasefika e oo foi lava i Niu Sila pe a ou alu i ai, e sili atu lava... o lea lava e matua affordable and reasonable le tau o le tatou telefoni lea e i ai i lou talitonuga. E le gata ua i ai le capacity, o le speed ma tulaga faapena, ae na pau

lava le mea, e i ai mea aua e le faapea e selau pasene mea uma e fai. O mea ia e tau tagai agai i ai. O nai tuualalo na...

Afioga Hon Toelupe Maoiautele Poumulinuku Onesemo (Minisita mo Fesootaga ma Faamatalaga Tekonolosi): Lau Afioga i le Fofoga Fetalai...

FOFOGA FETALAI: Ia malie lau Afioga i le sui usufono mamalu se i...

Tofa LEALAILEPULE RIMONI AIAFI: Faapea lava au ia e le i oo i le taimi e tali mai ai le...

Afioga Hon Toelupe Maoiautele Poumulinuku Onesemo: O se taimi tali atu, ae o lea ua toe maua i i le tali a le Afioga i le Taitai o le Itu Agai. O la e fai mai le Taitai o le Itu Agai e taugata, a o lea e fai mai e taugofie. O lea lava ua toe tau feteenai o la finagalo. Faafetai.

FOFOGA FETALAI: Ia tulai mai lau Afioga i le sui usufono mamalu.

Tofa LEALAILEPULE RIMONI AIAFI: Ia a foi la lena ia manatua o le tulaga lena, o le finagalo lena lea ou te fai atu, e eseese lava finagalo o tagata i mea latou te faaogaina. A tatou talanoa loa i le TV lea i le mea o le Sky TV ma mea faapena, e taugofie la isi vaega. A o le mea lava tau telefoni lea ou te talanoa atu ai, mea tau telefoni, mea ia sa galulue ai tatou i le amataga ma le tau aumaiga o le technology. E taugofie mamao lava le taimi lena i lo le taimi muamua. E taugofie pe a e alu i Niu Sila ma Ausetalia le tatou telefoni i lo vaega na i lou talitonuga lea e i ai. A o mea la ia tatou te tilotilo i ai, unlimited, o mea la na o lea e i ai le poloka. O le mea la lena o lea e avatu ai le fautuaga lea e avatu i le Minisita ma le... o mea na e tilotilo ia i ai pe mafai ona ia faatinoa. O suiga na, o suiga na e agai ai ona iloa lea o lea e progress se atinae. A alu atu e tilotilo lava e le mafai ona fai, toe tilotilo i ai i le toe aumai i tua, aua o lou talitonuga, a e tago e toe aumai i tua se mea o la e alu i luma, e tele lava le faaletonu.

E ui i lea, o le mea lea na saunoa i le Regulator, faafetai tele lava. E muamua ona faamalo i le Afioga i le Palemia ma le Kapeneta i le toe filifiliina o le faletua ia Gisa ua lava lona tomai i lena galuega, faamalo lava. A o lea na taua i Lipoti uma ia e lua le mea lea o le Digital TV. Ia manatua foi sa i ai le tatou feagaiga, aiaiga ma le Malo talu ai i le free to air lea, e le gata i le fono a le Palemene, ma isi tulaga faapena. Po o le a le tulaga o i ai. E le gata i lea, tatou te iloa uma lava le taugata, ae sa ave le fesoasoani a le Malo ia tuu i lalo a latou tau, ia affordable, ia gafatia e nai pisinisi ia nai TV, aua e le toatele. O le a le tulaga o i ai. A o lea na tatou vaavaai uma atu lava, ua tau toe faatau ese le laisene lea o le Digital TV, e le taugofie. A o le fesili lena i le vaega lea po o le a le tulaga o i ai. E le gata i lea o le mea lea na taua i le Lipoti, o tagata foi nei e feoai i fafo e faaogasese ai ID i vaa, marine vessels, po o le a le tulaga o i ai i lea vaega aua o se solitulafono ogaoga tele lena mea. Po o le a le tulaga o i ai i le faagasologa i luma.

Ia o le manatu lea lau Afioga i le Fofoga Fetalai, faafetai mo lou avanoa, faafetai i le Komiti mo nei Lipoti. Ma le faaaloalo lava. Faafetai.

FOFOGA FETALAI: Malo Faafetai. Ia se i saunoa lau Afioga.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai na o si mea lava sia ou te manatu e fia faasao. Masalo e le i maua mai e le Minisita lea na tu sese mai, o lau tautalaga o lau tautalaga i le star link lea e mafua ai ona fai le faasalalauga a le tatou Pule Faatonu, e faasala nisi o latou aumaia le star link lea a Niu Sila mai Niu Sila ona e taugofie.

O lau la fautuaga, tilotilo lelei i le tatou tau, aua o lau faalogo e taugofie tele le star link ia o faatau mai e o tatou tagata, ona alu lea o tupe i o i Niu Sila, ma e taua le faasa lea e faasa ai, ae tatau foi ona tilotilo i tatou tau po o le a le tulaga o i ai aua e mafua ona fai le mea lea, lona uiga e taugata tatou.

FOFOGA FETALAI: Faafetai o lea ua malamalama lea tulaga. Malo lava faafetai.

Ia...

Afioga Hon Lautafi Fio Selafi Purcell (Satupaitea): Lau Afioga i le Fofoga Fetalai pe maua se avanoa.

FOFOGA FETALAI: Ia manatua foi ua uma ona fai le tatou faaiuga e faapena. Ae faigata o oe o le sui usufono... ia se i saunoa mai lau Afioga i le sui usufono mo Satupaitea.

Afioga Hon LAUTAFI FIO SELAFI PURCELL: Faafetai. E faatalofa atu i lau Afioga ma le mamalu o le Maota i lenei taeao. E leai ou te tulai lava i lenei taimi e fia fai sou leo i le falemeli, aua foi o le tofiga muamua lava o au faa-Minisita o le Minisita o Faalapotopotoga Tumaoti. E tasi la lenei Faalapotopotoga Tumaoti sa i lalo foi o lau vaavaaiga lautele. E ala ona fai atu se leo lau Afioga ona o le faigata ia o le survival o le Postal i le taimi ua... lea na saunoa i ai nisi ua malosi mai le faatekonolosi ua le toe lafo ni tusi, ua le o toe... ae maofa lava o le taumafai o le Matagaluega lea ina ia olaola pea, survive pea ma... Na pau lea o le Matagaluega lau Afioga ou te lagona e au i taimi uma sa ou vaaia ai le vaega lea, o tausaga uma lava e maua lava le latou tupe faasili, e maua lava. E le tele ae maua lava. O lea foi la e oo mai lava i le taimi lenei o lea foi ou te faalogo atu, o lea foi na maua le latou tupe faasili. E sogasoga lava foi le Tamaitai Pule sa i ai ina ia silasila i nisi auala e mafai ona faalautele mai le auaunaga, ae maua atu ai nai seleni. E to lava lou pulou i le Tamaitai Pule lea, ona e le faigofie le taumafai pea ia olaola pea le falemeli. O lea lava... aua o se auaunaga e taua tele. O a lava tekonolosi, e i ai lava mea e tatau lava ona aumai le falemeli, e pei o tatou faamomoli, o meli foi ia puipuia ma tulaga faapena. So the service is critical service ma e faamalo atu ai. O lea ua maua tala ua faaiuiu le auaunaga a si tamaitai lea sa vaaia mai lava le falemeli i le taimi foi o ou vaaia ai e au ia... E momoli atu le faamalo a lou nei sui usufono,

ia manuia ou laasaga ona o lea o le a see atu i le isi tulaga, ae faafetai tele mo taimi sa tatou mafuta ai ma le naunau ina ia tulai mai le falemeli o se auunaga e faaauau pea.

Ia o le leo lea o leni sui usufono i leni taimi e faafetai atu ai i le Tamaitai Pule o le a malolo ua faamavae. Faafetai.

FOFOGA FETALAI: Malo faafetai. O le avanoa leni o lau Afioga i le Taitaifono o le Komiti o Vaega o Atinae Eseese aua e tolu a outou Lipoti. Ia, muamua mai lau Afioga i le Taitaifono o le Komiti o Vaega o Atinae Eseese.

Afioga FEPULEAI FAASAVALU FAIMATA SUA (Taitaifono o le Komiti o Vaega o Atinae Eseese): Faafetai i lau Afioga mo le avanoa i lau Afioga i le Fofoga Fetalai. E talu ai e 2 Lipoti a leni Komiti ua mafai ona talanoaina e le Palemene i leni taeao. Talu ai lau Afioga i le Fofoga Fetalai, e maea lava saunoaga a sui usufono mamalu e leai lava se vaega o laga mai ma tuufesili mai. O le tele lava o manatu ma lagona ma finagalo o sui usufono mamalu e agai i le Afioga i le Minisita. Ia, a o le matau i ai, ia o lo o faaleo foi le agaga faafetai o sui usufono mamalu o le Komiti e ala i le Lipoti. O le matau lea a le Komiti, faafetai tele i sui usufono mamalu mo saunoaga matagofie i le tou lagolagoina o le Lipoti a leni Komiti. Faafetai.

FOFOGA FETALAI: Malo faafetai. Tulai mai lau Afioga i le Taitaifono o le Komiti o Tupe Maua ma Tupe Totogi.

Afioga FALEOMAVEGA TITIMAEA TAFUA (Taitaifono o le Komiti o Tupe Maua ma Tupe Totogi): Faafetai mo le matou avanoa i lau Afioga i le Fofoga Fetalai. E faatalofa atu foi i leni taeao fou i le alofa ma le agalelei o le Atua. Talu ai e le tele ni fesili na tuuina mai e ala i le Lipoti a le Falemeli... leni Matagaluega... leni vaega sa iloiloaina ma faatinoina.

O le saunoaga muamua a le Afioga ia Tuilaepa, ona e talu ai o lo o i ai i totonu o le matou Komiti... O lea... na o ana tuualalo ma ana faamanuiaga i le tatou falemeli.

See mai i le... e faapena foi ma lau Afioga Lautafi. Ia, ona oo mai lea ia Sulamanaia. Malo faafetai Sula. Faafetai mo fesili. O le fesili muamua i le 200 pusele lea e... Ia, mo lou silafia, ua uma ona... o suesuega muamua a leni Komiti na faapena ona toe faafou uma le tele o vaega ia, tuu i ai ma cameras ma vaega eseese uma aua le agai i luma. A o le taimi la leni i tatou pusa meli nei, o lo o avanoa mo le lautele o si o tatou atunuu, a o lo o faapena ona toe lelei atoatoa mo le faaogaina.

O le isi vaega pei ona e taua o le... o le tai \$1 lea ma ave i Fono Faavae. Manaia le finagalo, ia ae taatia mai, faataatia mai lou finagalo se i tilotilo i ai mo le agai i luma ae malo faafetai le sogasoga i mea lelei lau Afioga.

Ia, pau ia o nai vaega na tapa ai le fia malamalama o sui usufono mamalu o le tatou Palemene nei ma le agaga faaaloalo lava i lau Afioga.

FOFOGA FETALAI: Malo faafetai saunoa i lau Afioga i le Taitaifono. Ia, na o se fautuaga a le Nofoa ia... o tatou Tulafono Tumaui ia faaoga pea o tatou sui usufono o itumalo taitasi ae le taua o tatou suafa ina ia faapena ona faamamalu ai pea le tatou fonu mo le agai i luma.

Tulai mai lau Afioga i le Minisita mo le Tali a le Malo.

Afioga Hon TOELUPE POUMULINUKU ONESEMO: Faafetai tele i lau Afioga i le Fofoga o le Fonu e tusa ai ma le avanoa o lenei Matagaluega ia po o lenei Vaega Tumaoti o le Faigamalo e tuu atu ai foi le tapenaga o i ai le Malo i lenei vaitau e tusa ai o finagalo o sui usufono.

E muai faatalofa i le alafa o le Maota, aemaise foi o le tapuaiga mamalu a Samoa i ona tupu ma ona ee, ae tainane foi le aufaitatalo o lo o tapuaia faiva o lau Afioga ma le Palemene i ona faiva ma tiute. E faatalofa atu foi i lenei Vaega Tumaoti a o le i sii le sa o le tatou Matagaluega i Afioga i Ofisa Sili o Pulega o Matagaluega ma le aufaigaluega aemaise lau Afioga i le Minisita Lagolago.

E momoli le agaga faafetai i le Komiti, le Komiti o Atinae Eseeese aemaise foi o le Komiti o Tupe Maua ma Tupe Totogi e tusa ai o le galuega e pei ona faatinoina e auala mai ai fautuaga i lenei Matagaluega. E le itiiti le taua o galuega a Komiti aua lava le faatofalaiga a lau Afioga i le Fofoga Fetalai e auala mai i Komiti aua le manuia auiluma o le auauanaga a Matagaluega a le Malo.

E faapena foi ona i ai le agaga faafetai i le saunoaga matagofie a le Afioga i le Taitai o le Itu Agai aemaise foi o sui usufono sa saunoa e aumai le faamanatu, e fautuaina aemaise ai foi se tuualalo mo galuega mo lenei Matagaluega. Lau Afioga e le itiiti le taua o le tulaga tau fesootaiga, e molimau lava taitai o le lalolagi i le taua o fesootaiga lau Afioga. O le isi lea manaoga o Malo Faatemokarasi o le manino ma le lelei o fesootaiga i so o se itu aemaise lava i faigamalo e agai atu i le tautuaina o atunuu. E oo lava i le tapenaina o Tulafono, e tatau ona manino lelei le faamaninoina o tulaga e pei ona i ai. O le fiafiaga lea lau Afioga, e pei ona mulumulitai ai lau Afioga e ala i le tatou Palemene ma le faasalalauina o le fonu ina ia manino tulaga ia, aua o vaega ia o faigamalo lelei ma le tulaga o le temokarasi ina ia lelei fesootaiga.

E faapena foi lau Afioga i le tulaga tau atinae e pei ona saunoaina. O le taimi o le Koviti-19, ia, semeamanu ua lelei tatou fesootaiga. E pei o le agaga lea lau Afioga, e le itiiti ai le faafetai i le manino foi o fautuaga a le Maota i le faatauaina o le tulaga tau fesootaiga. Lau Afioga i le Fofoga Fetalai, i le taua o le fesootaiga o lo o taoto ai i totonu... Saunoa foi le Afioga i le Taitai o le Itu Agai i le amataga o lenei vaiaso i le tulaga o atinae tusa po o le a le tulaga o i ai tau seleni a o atinae faaauau. E pei o tatou auala, leai ni tupe maua, e tatau lava ona faaauau. Tulaga o le tatou eletise e faapena. E faapena foi ma le suavai lau Afioga. O atinae nei o lo o invest e le Malo, faigamalo lelei mo le lumanai e faapena le tulaga tau fesootaiga. Aua, ia e le tau faamaninoina o lea ua manino i ai le Maota i le taua o fesootaiga. O nisi ia necessity i lenei vaitau, taua i le tagata soifua, e i ai le auala, e i ai le vai, e i ai le eletise ma ia i ai fesootaiga.

E pei o le agaga lea lau Afioga, e momoli atu ai le agaga faafetai. Lea foi o lo o manino i le tulaga, i le taua o le tulaga tau fesootaiga pei o long term investment ia a faigamalo lelei mo le tagata. E tele foi isi tagata o atunuu o le

lalolagi e le o fesootai. E le gata e le oo i ai le auala, tulou, ae faapena i fesootaiga. O le mea lea ua latalata ai i le 100 pasene, 95 pasene o le tatou atunuu ua oo atu i ai tatou fesootaiga. O telefoni, e oo foi i auala, tulaga faapena e oo foi i services a le falemeli e pei foi ona faamauina le finagalo o nisi o sui usufono i le taua o tatou auaunaga o fesootaiga e ala i le falemeli.

Lau Afioga i le Fofoga Fetalai, ia pei o le agaga lena o le faigamalo i le tulaga pei ona i ai ma e taua ai o le isi lea auaunaga, service a le Malo mo ona tagata. Pe mativa, pe i ai le tupe e faatau ai le credit pe leai, pe aoga i tua po o fea lava le aoga, e taua le service lea tau fesootaiga i so o se tagatanuu lau Afioga i le Fofoga Fetalai. O le ala lea o le tulai mai o le faigamalo e taumafai, ia, e totogi le internet mo aoga.

I le tulaga sa sau ai lau Afioga ina ua faamatuu atu i tua tatou aoga na i ai le poloketi a Ausetalia sa faatino ai le internet. Ina ua maea, ia na faapena lea ona le toe i ai, ua tagi lava i aao o Komiti a Aoga le tulaga tau internet. Ia, o lea ua tulai mai ona o le taua lea lau Afioga, taua o le internet ina ia oo uma i aoga aemaise lava o le faaogaina o le tekonolosi mo nei ma le lumanai. E pei o le agaga lea lau Afioga, ia, i nai faiga faavae laiti e suisui laitiiti ai i le tapenaga sa taatia ai.

O le tulaga foi lea lau Afioga i le Fofoga Fetalai, ia, ua saunoa foi nisi o sui usufono i le tulaga o le toe aumai. E le o i ai se agaga e toe aumai. Pau lava o lea ia i ai se sao o le Malo, i le tulaga ia aua ne i motusia fesootaiga. E i ai le faamoemoe o le Malo sa fai i le 2021-2022. Sa ou oo atu i ai, o la e la e faatali le afio mai o le malo faaaloogia ae tatagi lau telefoni. Ou te tago atu i ai o se tasi o le aufai TV, o le Pule o le TV, se tasi o TV i totonu ua motu le fesootaiga ua tape atu e le kamupani. O le tulaga lea o lea e popoe i ai le faigamalo lau Afioga i le Fofoga Fetalai, ia aua ne i tupu se tulaga lea. O le tulaga lea o lea ua saunoa manino le Afioga i le Taitai o le Itu Agai, lea ua tilotilo i le tulaga faapisinisi ae le tilotilo i le auaunaga. O le uiga lea i lau Afioga...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai o le faafesili atu lava... O le faafesili atu lava...

FOFOGA FETALAI: Ia malie lau Afioga i le Minisita se i....

Susuga Hon Tuilaepa Fatialofa Auelua Sailele Malielegaoi: Na tape lau telefoni ona ua uma le data ua le totogia? Aua e tele mea e tape ai le telefoni.

FOFOGA FETALAI: Ia, tulai mai lau Afioga i le Minisita...

Afioga Hon TOELUPE MAOIAUTELE POUMULINUKU ONESEMO: Ia lea ua maua faafetai... Faafetai lava i lau Afioga o lea ua...

Tofa Lealailepule Rimoni Aiafi: Lau Afioga i le Fofoga o le Fono. Ia, ona o le fia faasaoina o le taimi...

FOFOGA FETALAI: Ia, malie lau Afioga i le Minisita se i tuu atu le... E i ai se...

Tofa Lealailepule Rimoni Aiafi: Faafetai i lau Afioga. O le mea lea na ou talanoa atu ai i le mea tonu lea ua saunoa i ai le Minisita. Ne i te i ua tape, e le mafai ona tape. Aisea? E major shareholders le atunuu o Samoa, major shareholders Samoa i le marine cable. NPF, SLAC ma le UTOS, present nearly 70 percent o le ownership. A o le SLAC... A o le Vodafone ma le Digicel lena e toalima ai. E le mafai la ona tupu se mea faapea.

FOFOGA FETALAI: Ia, lea ua manino. Lea ua maua. Faafetai. Tulai mai lau Afioga i le Minisita.

Afioga Hon TOELUPE MAOIAUTELE POUMULINUKU ONESEMO: Ia, lau Afioga faafetai, e le aumaua avanoa o lenei Matagaluega. O lea ua tatala le atotonapona a le atunuu e ala i sui usufono, ioe, aua lenei Matagaluega. Amuia lenei Matagaluega lau Afioga i le Fofoga Fetalai, saunoa le... 40 tausaga o faipule, 23 tausaga o seei i le Nofoa Taitai o le atunuu. Masalo lea ua manino lelei Samoa i le mafuaaga na ave ai i tua, o le pisinisi, faapisinisi le tatou... O lona uiga, o matou i tua a leai se tupe, ia ua faapena. Lea foi la e saunoa le sui usufono mo Faleata, e pei e faapena. E talanoa... O la e manino lava le Maota lenei, e le mafai foi... E faigofie lava aua e tele lona tamaoaiga, o matou i tua e faapena le...tatau ona fully equipped.

Tofa Lealailepule Rimoni Aiafi: Lau Afioga i le Fofoga Fetalai leaga lea ua toe taua lou igoa. Faatoa uma nei lava ona saunoa le Minisita, 99%, 99% o le coverage, faatoa alu atu nei lava ananafi. O ai na faia le coverage? O le agaga lena o le atunuu ia soo uma Samoa po o fea e te i ai, o le a le level o lou tamaoaiga. E mafai ona faatau lau data \$1, faatau lau data \$2, sa le masani ai Samoa i aso ia. Maua lau \$5 maua lau data. E le i masani ai Samoa i aso ia. E te alu atu nei ua uma na i ai mea na.

FOFOGA FETALAI: Lea ua maua atu...

Tofa Lealailepule Rimoni Aiafi: Ae leaga o lea e pei e... Lau Afioga, lea e pei e faaoloataua ae le talafeagai.

Afioga Hon TOELUPE MAOIAUTELE POUMULINUKU ONESEMO: Faafetai i lau Afioga. E le o se tala a Toelupe...

FOFOGA FETALAI: Malie ia lau Afioga i le Minisita. Ia, e faapena lava le fetuutuunaiga. Ia, saunoa lau Afioga e...

Afioga Hon TOELUPE MAOIAUTELE POUMULINUKU ONESEMO: E faamalie atu lau Afioga, e le o se tala a Toelupe. O le saunoaga a le Taitai o le Itu Agai na fai i se tasi o Minisita i le Paeaiga talu ai i le tulaga lea o le

tamaoiga ma le faapisinisi. E pei o le uiga lea lau Afioga, o lenei faigamalo, alofa i le atunuu. O le tulai mai o le faigamalo, 20% ua i lalo o le fua o le mativa. O faiga faavae uma nei e oo i le \$1miliona lea ua avatu i tua o le tapenaga atoa lena lau Afioga. O le fesoasoani...

Tofa Lealailepule Rimoni Aiafi: Lau Afioga i le Fofoga o le Fono, e le mafai ona faasaoina e matou ituaiga saunoaga faapenei...

FOFOGA FETALAI: Ia malie, malie le sui usufono mamalu se i taumafai atu pea le Nofoa ne i te i ua avea ma mataupu e fefinauai ai a o lo o taumafai le Minisita ina ia faapupula mai pea faiga faavae o lo o ua taumafai mo lenei taimi. Ia faautagia foi e le paia le Maota ia o lo o... O so o se faigamalo lava ua uma ona faataatia faiga faavae. Saunoa foi le Taitai o le Itu Agai e fesoasoani i faiga faavae o lo o taumafai i ai. E pei o le agaga lena o lea e taumafai atu ai le Nofoa aua a tatou fefinauai nei o lona uiga e alu le taeao o tatou...

Susuga Hon Laauli Leuatea Polataivao Fosi: Lau Afioga i le Fofoga Fetalai pe maua se avanoa?

FOFOGA FETALAI: E pei o le fesoasoani atu lea a le Nofoa i sui usufono mamalu...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, se o lea e matou te onosai lava. Ua toeitiiti lava ona ou tautala atu loa lea i le Minisita lela e tautala mai... Ua toeititi lava ona ou tautala loa lea i le Minisita le la e tautala mai...

FOFOGA FETALAI: Ia malie lau Afioga i le Taitai o le Itu Agai...

Susuga Hon Tuilaepa Fatialofa Auelua Sailele Malielegaoi: Ua toeitiiti a ona ou tautala loa lea...

FOFOGA FETALAI: Malie lau Afioga i le Taitai o le Itu Agai...

Susuga Hon Tuilaepa Fatialofa Auelua Sailele Malielegaoi: I lou talaaga i totonu o le Malo.

FOFOGA FETALAI: Malie lau Afioga i le Taitai o le Itu Agai...

Susuga Hon Laauli Leuatea Polataivao Fosi: Faafetai mo le avanoa...

FOFOGA FETALAI: Tulai mai lau Afioga i le Minisita mo Faatoaga ma Faiga Faiva.

Susuga Hon Laauli Leuatea Polataivao Fosi: Ou te fesoasoani atu i le mea lea e tau faapulapula atu e le Afioga i le Minisita mo Fesootaiga. O le mea lea

tatou te finau ai, o le a le mea e taugata ai le initaneti? Ae a tatou tilotilo i le mea na mafua ai ona taugata ua uma ona fai le submarine cable a le Malo, ona nonofo lea o le Faigamalo le la ma ave faa-privatize.

A o le auga o le mea sa tatau na i ai sa tatau na tuu le broadband ma le submarine cable a le atunuu, e run e le Malo. O le a le mea lea ua tupu? Ua uma le omai faifaatasi ae ua collude.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai...

Susuga Hon Laauli Leuatea Polataivao Fosi: Lea la e le mafai ai nei ona fai...

Susuga Hon Tuilaepa Fatialofa Auelua Sailele Malielegaoi:
[.....].

Susuga Hon Laauli Leuatea Polataivao Fosi: Lea ou te faamatala atua...

Susuga Hon Tuilaepa Fatialofa Auelua Sailele Malielegaoi:
[.....].

FOFOGA FETALAI: Malie lau Afioga i le Taitai o le Itu Agai...

Susuga Hon Laauli Leuatea Polataivao Fosi: Lau Afioga i le Fofoga Fetalai o lea ou te taumafai e faapulapula le mea lea e saunoa ai le Minisita...

FOFOGA FETALAI: Ia ua...

Susuga Hon Laauli Leuatea Polataivao Fosi: O ai tatou te cater i ai? O le atunuu. E le o ni suegatupe mea lea e fai ua aumai faatasi ai Kamupani ia e lua ae tuu Kamupani a le Malo o lea...

Susuga Hon Tuilaepa Fatialofa Auelua Sailele Malielegaoi: Oi a le sue tupe o lea e te sue tupe ai...

Susuga Hon Laauli Leuatea Polataivao Fosi: E maua ai a tatou polofiti...

FOFOGA FETALAI: Ua faamalulu atu...

Susuga Hon Laauli Leuatea Polataivao Fosi: O le ala lea lau Afioga i le Fofoga Fetalai ua ou manatu e taua le fingalo o le Minisita e vaai le tau mo le atunuu...

FOFOGA FETALAI: Ia faafetai ua...

Susuga Hon Laauli Leuatea Polataivao Fosi: A o lea ua taaalo le au milionea e sii lava le tau i le mea e alu i ai, a o le a le upu na fai? O le upu lea ou te manao e faataua, fai mai e leai se capacity a le Malo e run ai le submarine cable, lea na mafua ai ona aumai le Digicel, le Vodafone ma isi Matagaluega a le Malo. Ae le pulea atu e le Malo le faiga o tau e pule a latou. O lea la ua tatou alu ai i le taimi lenei, ua alu le tapasa. Lea la e taumafai atu le Afioga le Minisita e faamalamalama.

Tofa Lealailepule Rimoni Aiafi: Lau Afioga i le Fofoga o le Fono o lena o le a sese tele le mea t ai le lē malamalama o le Minisita lea...

FOFOGA FETALAI: Ia malie, malie o lea ua...

Tofa Lealailepule Rimoni Aiafi: O le a sese tele i le lē malamalama e le o privatize e ese le mea e tau o le privatization ese le mea e tau o le...

FOFOGA FETALAI: Malie le Afioga i le sui usufono mamalu...

Tofa Lealailepule Rimoni Aiafi: Ese le mea e tau o le PPP e te le o malamalama i le privatize ina o le mea...

Susuga Hon Laauli Leuatea Polataivao Fosi: Aua e te soona saunoa...

Tofa Lealailepule Rimoni Aiafi: E le malamalama le Minisita lea e le o se private le...

Susuga Hon Laauli Leuatea Polataivao Fosi: Aua e te soona saunoa le mafaufau...

Tofa Lealailepule Rimoni Aiafi: E te le mafaufau, e leai se private. E te malamalama i le mea e tau o le Private ma le mea e ta'u o le PPP?

Susuga Hon Laauli Leuatea Polataivao: [.....].

Tofa Lealailepule Rimoni Aiafi: [.....].

FOFOGA FETALAI: Se sole... Ia...

Susuga Hon Laauli Leuatea Polataivao Fosi: [.....].

FOFOFGA FETALAI: Ou te faamalulu atu...

Susuga Hon Laauli Leuatea Polataivao Fosi: [.....].

Tofa Lealailepule Rimoni Aiafi: [.....].

Afioga Hon Valasi Luapitofanua Toogamaga Tafito Selesele (Minisita mo le Soifua Maloloina): Lau Afioga, e fia faatu le lafo ua le mafaufau le sui usufono lea. E faatu le lafo, *E ave i fafo ma le fonu, e le na o ia se fonu. Tau tomanatu o le tofa liliu a Samoa le tofa liliu a Samoa e le o se Maota o se faipule se toatasi. Faamolemole lau Afioga faatu le lafo.*

E le i faaluaina le lafo.

FOFOGA FETALAI: Ia e i ai se isi e na te faaluaina le lafo?

Afioga Hon Loau Solamalemalo Keneti Sio (Sagaga 1): Lau Afioga i le Fofoga Fetalai...

FOFOGA FETALAI: Ia se i tulai mai lau Afioga i le Tamaitai Palemia.

Afioga Hon Fiamē Naomi Mataafa (Palemia): Lau Afioga i le Fofoga Fetalai ma le mamalu o le Palemene ia ua siisii foi le tatou taeao, ae o lea e maua atu le taua o lea foi Vaega Tumaoti o le atunuu mo le atinae aemaise o le manuia laalaa i luma.

E tatalo atu i lau Afioga i le Fofoga Fetalai, lau Afioga i le Taitai o le Itu Agai ma le tatou Maota. A tatou tata lava i le moa o le ala ma tatou silasila i itu taua, ia e sii mai i mau a faipule. O lea foi e taumafai atu Minisita ia e leai se mea o le a tatou felauai ai. Ia vaai le sii le ua oo i ai na manaia le matagofie o le tatou taeao ae lea ua oo i luga. Ua faaoga foi le gagana e faafaigata ona faafoi a o lea e faafogafoga mai le tatou atunuu. E tatalo atu i a outou Afioga foi i le Kapeneta ma le tatou itu, ia mau mai le tofa.

Ae o le talosaga lau Afioga i le Fofoga Fetalai e lafo atu pea e faafoe mai e lau Afioga le tatou mataupu. E ese le manaia o le faasologa o Lipoti nei o le matou fonu sa fai ma le Afioga i le Fofoga Fetalai ma le Afioga i le Taitai o le Itu Agai, e saili le auala e mafai ai ona faatino le faagasologa o Lipoti.

Mo tatou ia ua leva na i ai i le Maota, ia e salasala lava le faiga o tatou Lipoti o le tele o taimi, e faamaonia i lona tulaga lautele ona faasolo lava lea. A o lea ua maua le avanoa e sasaa ai le tofa ma le uta o le Maota i a tatou mataupu. Ia, Afioga i sui usufono ua siisii o outou leo ia maua le agaga o le faamagalō. A o le tatalo lena i lena taeao, tatou faagasolo i le matagofie o le tatou galuega sa tatou sau a'i. O le talosaga lea ma le faaaloalo.

FOFOGA FETALAI: Malo faafetai le malele...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai...

FOFOGA FETALAI: Ia tulai mai lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: Ou te faamalulu atu foi, e taua le tuualalo a le Palemia. O le a foi se maitau ia ona o

tulaga lava na lea sa maitau mai foi o lea e taumafai e avatu fautuaga mo le agai i luma o le tatou galuega.

A o le mea lea i le susuga i le Minisita lea e saunoa nei, ia malie ia i le taumafai e aumai mataupu e faavevesi ai e le lelei, ae o lea tatou te galulue i le agaga o le feoeoeai. Ma ou te matua lagolagoina foi lou finagalo ma le finagalo o le Tamaitai Palemia.

FOFOGA FETALAI: Malo faafetai malo le saunoa i...

Susuga Hon Laauli Leuatea Polataivao Fosi: Lau afioga i le Fofoga Fetalai...

FOFOGA FETALAI: Se i tulai mai lau Afioga i le Minisita mo Faatoaga ma Faiga Faiva.

Susuga Hon Laauli Leuatea Polataivao Fosi: Ia o sasa lava o lenei taeao ona e manao e faamalamalama ma manino leaga e le na o tatou lea e fonu o la e faafofoga le atunuu. O lea sa ou tulai atu ai e tau faapulapula le mau a le Afioga i le Minisita, leaga o lea e tuuaia o le a le mea ua taugata ai le initaneti i le taimi lenei, ae le se mea na fai nei na fai ananafi.

A o le tulai mai lea o le sui usufono ma lalafo mai e le malamalama lea foi ua oo upu i tuuaiga leaga ua soo ai le lalolagi atoa i le faaleagaina o lou tagata. Lau Afioga i le Fofoga Fetalai, aveese upu ia faamolemole leaga e le tuga le mea lea. Ua uma na fai mea nei a Tuilaepa i le la Paeaiga a o lea foi ua fanau mai Leala sau foi fai mea ia.

Ae ou te faamalulu atu i lau Afioga i le Fofoga Fetalai, afai e sii se gagana e tasi lava le mea o le fesoasoani i le Minisita e faamalamalama le mataupu. Ia tatou ave lea i uta ae faafoi mai foi se upu ua lafo atu ona o tulaga o le vevesi o le taeao. Ma le agaga faaloalo, e faamalulu atu foi i le faafogafoga mai a Samoa.

FOFOGA FETALAI: Ia tulai mai le sui usufono mo Faleata mo lau saunoaga a o faafofoga le Maota, tulai mai.

Tofa Lealailepule Rimoni Aiafi: Ia ou te tu atu ma lou agaga loto maualalo e faatoese atu i lau Afioga ma le mamalu o le Fono aemaise foi lau Afioga i le Tamaitai Palemia. Malo faafetai. E faamalulu foi i le uso vaeane lau Afioga i le Minisita, o a foi ni upu ua laavale i lenei aso ma lenei taeao ia toe faafoi mai. Le faafofogaaga a Samoa e faamalulu atu i lenei taeao...

FOFOGA FETALAI: Ia faafetai...

Tofa Lealailepule Rimoni Aiafi: Ae faatoese atu ai i lau Afioga i le Fofoga o le Fono ma le Maota i lenei aso. Ma le faaloalo lava. Faafetai.

FOFOGA FETALAI: Ia malo faafetai...

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai...

FOFOGA FETALAI: Ia sei tulai mai lau Afioga i le Minisita o le Soifua Maloloina.

Afioga Hon Valasi Luapitofanua Toogamaga Tafito Selesele: Ona o lea sa ou tulai atu e faatu le lafo a o lea ua saunoa le Tamaitai Palemia, o le a lolo foi se taofi. A o tulaga o mea faapenei, ia e mafaufau lava le tofi po o le a le mafuaaga na sau ai i le Maota, ia i ai le ava ma le faaaloalo o le Maota o Samoa. Ia ae faafetai i lau Afioga.

FOFOGA FETALAI: Ia faafetai... ua i ai le manatu o le Nofoa ua talia ma le agaga faafetai le saunoaga a le Tamaitai Palemia aemaise foi o le Taitai o le Itu Agai ina ia tatou maua le fefaamagaloi.

O le tiute lea... ua outou silasila mai i le Fofoga Fetalai o lea lava e nofonofo atu ma taputapuatu ia ma tatalo atu. E le o i ai lava se malosiaga o le Nofoa o taumafai ina ia faavevesi le tatou Maota. E faalagolago atu ia outou Afioga o Taitai o le atunuu e moomia lo tatou galulue faatasi. O lenei taeao ma upu foi ua siisii i lenei taeao. Ia faafetai o lea ua silasila le Atua i outou loto faamagalo o le agaga foi lea o le Nofoa, e le o manatu lava le Nofoa e vaevaeina lo tatou Maota a o feagai ma Taulumaga.

O le mea lea ia tatou maua le loto faamagalo i lenei aso ma o upu foi na felafuai. Ia o lea o le a faatonu le Failautusi e aveeseina ma faamaumauga a le Palemene. A o le tatalo lava lea i lau Afioga i le Minisita. Ia leai e le... o lea lava ua manaia saunoaga i le amataga aua foi le taliaina o fautuaga a... o avanoa le aumaua e sausaunoa ai foi lea itu i Faiga Faavae ma fesoasoani mai i le tapueina atili.

E fiafia lava e faalogologo atu o lea ua talia. Ia o le vaega mulimuli lava pei ua toe lagalaga ai le tatou Maota o le uiga lea o se fautuaga a le Nofoa, ae faautagia foi le saunoaga malele a le Taitai o le Malo o le Afioga i le Tamaitai Palemia. Ia maua pea le toamalie o le tatou Maota o le agaga lea o le Nofoa i le tauaveina ma le taitaiina o le tatou Fono.

Tulai mai lau Afioga i le Minisita, ia faauma maia le saunoaga.

Upu na faatonuina e le Fofoga Fetalai e aveese mai Faamaumauga o le Saunoaga a le Taitai o le Itu Agai: “[*Ou te musu ou te tautala i le Bluwave a lea... Ou te musu ou te tautala i lau BluWave lea na maimau atu ai le \$2milion*]”.

Upu na faatonuina e le Fofoga Fetalai e aveese mai Faamaumauga o le Saunoaga a le Minisita mo Faatoaga ma Faiga Faiva: “[*Sa le tatau na e nofo i i i le Fono lenei. Ua e iloa? You are corrupt, ua uma na e convict... You are fully convicted, you are a criminal*]”.

Upu na faatonuina e le Fofoga Fetalai e aveese mai Faamaumauga o le Saunoaga a le sui usufono mo Faleata 3: “[E le tatau foi ona e nofo ua leva na tatau ona tuli oe lou mea aigagaai. Ua tatau na tuli ese oe lou mea aigagaai]”.

Afioga Hon TOELUPE MAOIAUTELE POUMULINUKU ONESEMO:
Faafetai, faafetai tele i lau Afioga e ava foi ma faaeteete foi se manatu, pau a lea lau Afioga leai e le o au lea na faavevesi.

O lea e tali atu le Malo e tusa ai ma Faiga Faavae pei e foliga e... ae le toe oo la i ai se tala, e le o faavevesi le Minisita o Fesootaiga leai o lea e tau faapulapula nai nisi o Faiga Faavae i tulaga e i ai. Ae faafetai i lau Afioga ma le mamalu o le Fono i lenei taeao.

O le... saunoa nisi o sui usufono i le tulaga o le coverage ona o le 200 pou ua i ai ma o le taimi nei 100 ma ona tupu pou a le Digicel e faapena foi le Vodafone lau Afioga i le Fofoga Fetalai. O le agaga tonu lea o le Faiga Faavae lea e tau agai i ai ona o le tulaga, tatou te le manao e tofu le Network ia ma le latou infrastructure.

O lo o i ai foi le Faiga Faavae sa taoto i le Faigamalo talu ai i le infrastructure sharing co-location lau Afioga, na tapena i le 2011 lea ua oo mai i le 2024 lau Afioga e le atoa se 15 tower share mai le 200 ona o lenei lau Afioga i le Fofoga Fetalai, ua silasila foi i ai le Faigamalo e tapena ai lana Faiga Faavae mo le lumanai. O lenei lau Afioga i le tulaga e i ai ua tele na omai nai o tatou tagata i Apia ia ua tele i le tulaga i Falealupo, e tasi a le tower o lo o tu ai ma nuu tuaoi i ina i Sataua e faapena.

O le agaga o le Faiga Faavae o lo o naunau i ai le faigamalo ia fesoasoani le Faigamalo ia tatou service providers i le tulaga lena, o nai faiga faavae laiti. Ae moni o lo o lelei le tulaga o iai i tekonolosi ma le tulaga faapena a o le sustainability lau Afioga, aemaise foi i tulaga o tatou service providers o lo o agai ai faapena le silasila a le Faigamalo.

Lau Afioga i le Fofoga Fetalai, ona oo mai lea i le tau. Lau Afioga o le tulaga manino lena i lenei vaitau i le tau amataina o lea faatoa... e le i atoa se 20 tausaga seiavagana le SamoaTel o le Vodafone ua leva le latou infrastructure. O le Digicel faatoa tau amata, o capital investments nei a tatou service provider e le... lea e taumafai i ai i le tulaga lea. Ae o lo o fai le galuega a le Regulator lau Afioga i le competition lea e pei ona silasila i ai.

Ae a silasila i le aotelega o le faaoga a le atunuu o lo o tele ai le Malo, le usage ma tupe maua ma le tulaga i le tamaoiga, o lo o tele lava o le Malo. E pei o le uiga lea lau Afioga o lo o tilotilo manino a le Faigamalo i le tulaga lea, aua o le aotelega a o le sector lenei. O lo o tilotilo i ana tupe maua ma ana tupe alu o le taimi lenei o lo o tele le tupe e manaomia i mea a le Malo tau ICT, ae le o tele sana tupe maua e ala i lana laisene ma tulaga faapena. A o le agaga atoa lea lau Afioga, ina ia ola faatasi, ola le Malo pei o le PPP lea e fai mai ai, ia ola le Malo. Ae sili ia ola a tatou service provider ae sili ai ona taugofie mo tatou tagata. Ia o le agaga lea e le o tuulafoai atoa ai e le Faigamalo i tua i a tatou service providers le tulaga lea. E tatau ona i ai sona sao i le vaega lea pei o le...

O le mea moni lau Afioga manu o lea maua le avanoa, e le i faigofie le pale mai o le Faigamalo e oo lava i le taimi lenei e fiu e tau uunai, ona o le talitonuga o le aufaigaluega, lea lava o lo o taumafai i le talitonuga, e talitonu i le tulaga lea e agaga i ai le Faigamalo e fesoasoani mo tatou tagata, e le fai mo tatou tofiga ua tatou i ai. E pei e faapena lau Afioga. O lea lava e faifaimalie e le o i ai se suiga tele lea a e saunoa ua faalogo i suiga ae le o tupu, aisea? O lo o faigata le talitonuga aisea, lea a o lo o sausaunoa i faiga faavae lelei o lo o i ai faiga faavae. O lea e taumafai atu ia faiga faavae mo le atunuu ia o le agaga lena lau Afioga o lea faapea ai le galuega i lenei vaitau.

Ua tatou manino a o le PPP o le partnership i le va o le Malo ma le Private Sector peitai, e tilotilo foi i le itu i sao talafeagai, relevant contribution a sui ia o le PPP agai le tamaoaiga. E fua i tupe maua, fua i le aofai o galuega, fua i tupe a tagata lautele o le atunuu, fua i ai faiga faavae o lea taimi i lea taimi lau Afioga.

O le agaga lea, e le o agai atu faapea e... leai o lo o lelei, taoto maua lesona agai i le lumanai lau Afioga. E pei e faapena le tapenaga a lenei Matagaluega, ina ne i faapea mai, leai ua tali'a le Minisita.

Lau Afioga o le tulaga o tatou cable a le SNBH, le Network a le Malo. E manino lelei ma sao lelei, e tolu tatou cable o lo o i ai, o le isi lea lesona tele lau Afioga. O lo o i ai le tatou Manatua e agai i le itu i Sasae, o lo o i ai le tatou Tuisamoa e agai i Fiti o lo o i ai foi la ma le va o Tutuila... O tatou cables uma ia e tolu lau Afioga, ua i tua i le Private Sector. A o le tali manino a le Private Sector i le tau lea e i ai nei i le Tuisamoa lau Afioga vaeane le Maota ma le faafofogaaga. O lo o ua tele a tatou clients ua tietie i luga o le SAS, le cable lea i le va o tatou. Aisea? Fai lava si taugata laititi o le tulaga lea i le tatou Tuisamoa vaeane le Maota.

I le pale mai o le Afioga i le Minisita o Tupe ua uma ona ma talanoa aua o nei atinae tau cable e le o i lalo o lenei Matagaluega o Fesootaiga. O cable uma lava nei o lo o i lalo o le Matagaluega o Tupe lau Afioga i le Fofoga Fetalai. O lea ua uma ona fai le ma fesootaiga, e le gata o le a faase'e mai i le Matagaluega o Fesootaiga, ia avea le Matagaluega o Fesootaiga ma technical e limataitaiina ai le galuega o cables nei.

O le isi lena vaega e ala ai ona tau... aua o le taimi lenei o lo o tatou faamoemoe i le fautuaga tau tomai faapitoa, tatou Private Sector i le vaaiga o le tatou cable. A o lo o nofonono le tatou Matagaluega o le faamoemoe o le Malo ma le atunuu. Ia o le isi lea vaega lau Afioga lea e taumafai mai le PPP lenei ma... ia ae soia ia...

Susuga Hon Tuilaepa Fatialofa Auelua Sailele Malielegaoui: Lau Afioga i le Fofoga Fetalai...

FOFOGA FETALAI: Malie lau Afioga i le Minisita, tulai mai lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoui: O se mea e fia faasao. O le mea tonu lava lena na ala ai ona faatu le tatou Pule Faatonu. O ia

e te faaaogaina i le fetuunaiga o tau ia. A le talafeagai, o i e faaoga ai le Pule Faatonu. O le ala lena lea na ou talanoa atu ai ia te oe, e tilotilo i tau. O le mea la e fai, e te talanoa i le Pule Faatonu ona galulue ai lea o latou e fautua mai oe i le tau e tatau ona i ai. E tusa lava la po o Kamupani ia e i fafo, e oo lava i ai le leo.

FOFOGA FETALAI: Tulai mai le Afioga i le Minisita.

Afioga Hon TOELUPE MAOIAUTELE POUMULINUKU ONESEMO: Faafetai, ia masalo o lea e faafofoga mai le Pule Faatonu na ou talanoa lava i ai i le aso faatoa ou taunuu ai faatasi ai ma le puleaina o konekarate nei lau Afioga. Po o le a le faaiuga e oo i ai konekarate nei, pe a uma ona avatu le cable pe toe foi mai i le Malo, pe a uma ona totogi mai le tupe sa avatu i ai. E pei o le isi lea vaega, ua uma ona ou talanoa i ai. Ae o lo o i ai le talitonuga o lo o faatino le latou galuega, atonu o le aotelega lea lau Afioga.

FOFOGA FETALAI: Faafetai, malo.

Afioga Hon TOELUPE MAOIAUTELE POUMULINUKU ONESEMO: I le tulaga i le tatou SNBH, e sao lelei le Afioga, o le tulaga sa i ai lau Afioga i le Fofoga Fetalai, tatou network uma lava a le Falemai, Leoleo. O lo o i ai ni nai... Leoleo. Falemai ia o le MNRE e oo lava i le School Connectivity sa faaoga le tatou SNBH lau Afioga i le Fofoga Fetalai. I le faatinoga o lea tulaga sa responsible ai le tatou CSL lau Afioga, e ala lea i le latou puleaina, totogi i ai e le Malo le seleni e ala i le latou vaaiga o le location sa i ai i luga, monitor uma e latou.

Lau Afioga o le tulaga na i ai, sa ou feauina le CSL i le vaiaso muamua o le tatou Paeaiga lena. O le latou finagalo latou te prefer e galulue as a Private Company, a o le taimi lena o lo o tilotilo le Malo i lana Technical Arm e toe tilotilo uma i vaega ia lau Afioga i le Fofoga Fetalai. Aua o lo o manino lau Afioga o lo o vaivai le itu tau tomai faapitoa, technical i totonu o le Public Sector i le taimi lena lau Afioga. O lea ala lea sa i ai le manaoga lea i le CSL. Peitai e le i talia e le CSL lau Afioga. O lea foi la ua silasila i ai le Malo ina ia toe tilotilo i vaega ia.

O le tulaga pei ona fai mai e aumai i totonu o le MCIT. Leai, na o le management e aumai aua o le tele o tupe maua o le tatou SNBH e le o maua e lena Matagaluega, e le o avea ma return a le Matagaluega i lana Budget. O le ala lea lau Afioga lea sa fai ai le faaiuga a le Kapeneta na ona toe faamanino lava o le aumaiga ia ona toe ave lea outsource le tulaga o le manage ina ma le vaaiga. A o le puleaina lelei, lalo o le Malo. Peitai i le taimi tuanai, e le i manino le tulaga na taoto ai le revenue, tupe maua a le tatou SNBH i le taimi lena.

Ia pei na pau lea o nai mea laiti, pei lava ona ou fai atu ua uma ona taoto lelei, ae na o nai mealaiti ia, silasila i le aotelega o tupe maua ma tupe alu a le tatou Malo e ala i tatou fesootaiga.

Digital TV lau Afioga, e le o toe tele. Ia, atonu o lea ua manino le tulaga e i ai, e faapena foi le tulaga o lo o talia e le Faigamalo ma le Kapeneta le maliega

lea. Aua o le maliega na fai i lea taimi, avatu free le laisene ma tulaga. O le fesili, o le a le mea e tupu pe a uma le luasefulu tausaga o lea laisene. Ia e tai pei lava o auala foi nei i atunuu i fafo, luasefulu tausaga toe faafoi ai le tupe, a maea e toe foi mai le aseta a le Malo e faaauau ai. O auunaga nei fesootaiga e le tatau, le tatau ona avatu, e tatau lava ona i ai le sao o le Malo i totonu. Aisea? Ina ia tumau fesootaiga i so o se tafa o le atunuu lau Afioga.

O le Star Link ua silasila i ai o lo o talia le latou application, tulaga e i ai. O lo o tapu i lenei taimi ona o tulaga masani ae o lo o silasila i ai le Faigamalo i le avanoa pe a maea ona uia lelei ala o le Tulafono pei ona saunoa iai nisi o... Ia pei o le aotelega lea lau Afioga, e momoli atu ai le agaga faafetai.

FOFOGA FETALAI: Malo faafetai.

Afioga Hon TOELUPE MAOIAUTELE POUMULINUKU ONESEMO: Lau Afioga i le Fofoga Fetalai ma le paia o le Maota aemaise foi Afioga i Komiti mo le sao o lenei Matagaluega. Ma le agaga faaaloalo, manuia le Fono.

FOFOGA FETALAI: Malo saunoa i lau Afioga i le Minisita. Tulai mai lau Afioga i le Taitaifono o le Vaega o Atinae Eseeese mo le lafo o au Lipoti e 2.

Afioga FEPULEAI FAASAVALU FAIMATA SUA: Lau Afioga i le Fofoga Fetalai ou te faatu le lafo; *Ina ia faamaonia e le Fono Aoa le:*

1. *P.P. 2022/2023 Nu.121, Lipoti a le Komiti o le Vaega o Atinae Eseeese i le P.P. 2021/2022 Nu.5, & P.P.2021/2022 Nu.31, Lipoti Faaletausaga a le Ofisa o le Pule Faatonu mo Tausaga Faaletupe 2019/2020 ma le 2020/2021; ma le*
2. *P.P.2022/2023 Nu.118, Lipoti a le Komiti o le Vaega o Atinae Eseeese i le P.P.2020/2021 Nu.138, ma le P.P.2021/2021 Nu.32, Lipoti Faaletausaga a le Matagaluega o Fesootaiga ma Faamatalaga Tekonolosi mo Tausaga Faaletupe 2019/2020 ma le 2020/2021.*

Faaluaina e le sui usufono mamalu mai Lefaga ma Faleaseela, sui usufono mo Vaisigano 1 ma le sui usufono mo Falealupo.

Na faamaonia le lafo.

FOFOGA FETALAI: Ou te tapa lau Afioga i le Taitaifono o le Komiti o Tupe Maua ma Tupe Totogi mo le Lafo.

Afioga FALEOMAVEGA TITIMAEA TAFUA (Taitaifono o le Komiti o Tupe Maua ma Tupe Totogi): Faafetai mo le avanoa lau Afioga i le Fofoga Fetalai, ou te faatu le lafo, *Ina ia faamaonia e le Fono Aoa le:*

P.P.2023/2024 Nu.5, Lipoti a le Komiti o Tupe Maua ma Tupe Totogi i le P.P.2022/2023 Nu.142, Lipoti Faaletausaga a le Falemeli o Samoa mo le Tausaga Faaletupe 2021/2022.

Faaluaina e le sui usufono mamalu mo Vaisigano 1, sui usufono mo Falealupo ma le sui usufono mo Faasaleleaga 2.

Na faamaonia le lafo.

FOFOGA FETALAI: Ou te tapa lau Afioga i le Minisita o Fesootaiga mo le lafo.

Afioga Hon TOELUPE MAOIAUTELE POUMULINUKU ONESEMO: Lau Afioga i le Fofoga Fetalai, ou te faatu le Lafo, *Ina ia faamaonia e le Fono Aoa Tali a le Malo i Fautuaga a le Komiti o le Vaega o Atinae Eseese ma le Komiti o Tupe Maua ma Tupe Totogi.*

Faaluaina e le Minisita mo Taaloga ma Alagaoa mo le Fiafia o Tagata ma le sui usufono mo Falealupo.

Na faamaonia le lafo.

4. P.P.2022/2023 NU.109, LIPOTI A LE KOMITI O LE VAEGA TAU LE TAMAOAIGA I LE P.P.2020/2021 NU.77 MA LE P.P.2021/2022 NU.18, LIPOTI FAALETAUSAGA A LE FAALAPOTOPOTOGA O SUESUEGA FAASAIENISI A SAMOA MO TAUSAGA FAALETUPE 2019/2020 MA LE 2020/2021 - ILOILOGA

4.1. P.P.2023/2024 NU.21, TALIA LE MALO I LE P.P.2022/2023 NU.109.

5. P.P.2022/2023 NU.158, LIPOTI A LE KOMITI O LE VAEGA TAU LE TAMAOAIGA I LE P.P.2022/2023 NU.89, LIPOTI FAALETAUSAGA A LE FAALAPOTOPOTOGA O SUESUEGA FAASAIENISI A SAMOA MO LE TAUSAGA FAALETUPE 2021/2022 - ILOILOGA

5.1. P.P.2023/2024 NU.64, TALIA LE MALO I LE P.P.2022/2023 NU.158.

FOFOGA FETALAI: Tulai mai lau Afioga i le Taitaifono o le Komiti o le Vaega Tau le Tamaoaiga.

Afioga NIUAVA ETI L. MALOLO (Taitaifono o le Komiti o le Vaega Tau le Tamaoaiga): e Faatalofa i lau Afioga i le Fofoga Fetalai, faatalofa foi i le paia o le Palemene o Samoa, o Samoa foi o faafofoga ia aemaise foi lea ituvai i Ofisa Sili o Pulega o Matagaluega ma Faalapotopotoga Tumaoti.

Faafetai i lau Afioga i le Fofoga Fetalai, malo foi le to'atai, manatu lava o lau Afioga e tua faasagamau i ai navenave ma lilipi tialogo i ai le toau manunu o le Palemene o Samoa.

Ae ua ou tulai lau Afioga i le Fofoga Fetalai ou te faatu le lafo, *Ina ia faautagia e le Fono Aoa Lipoti e 2 a le Komiti o le Vaega Tau le Tamaoaiga, o lo o tuuina atu ai ana Saililiga, Fautuaga ma Iugafono.*

Faaluaina e le sui usufono mamalu mo Faasaleleaga 2 ma le sui usufono mo Gagaifomauga 2.

Na faamaonia le lafo.

FOFOGA FETALAI: Ou te tapa lau Afioga i le Minisita o le Faalapotopotoga o Suesuega Faasaienisi a Samoa.

Susuga Hon LAAULI LEUATEA POLATAIVAO FOSI: Lau Afioga i le Fofoga Fetalai, ou te faatu le lafo, *Ina ia faautagia e le Fono Aoa Tali a le Malo e faatatau i Fautuaga i Lipoti e 2 a le Komiti o le Vaega Tau le Tamaoaiga.*

Faaluaina e le Minisita mo Galuega, Felauaiga ma Atinae Esee, Sui Palemia ma le Minisita mo le Soifua Maloloina.

Na faamaonia le lafo.

FOFOGA FETALAI: O lea ua maea faautagia Lipoti e 2 a le Komiti faapea foi Tali a le Malo i Fautuaga a le Komiti.

Ua i ai le manatu leaga o lea ua tatou taunuu i le tatou taimi malolo o le taeao. O le a amatalia lelei tatou felafolafoaiga pe a tatou tatou taliu mai le malologa o le taeao. Ua faataatiaese Galuega a le Fono Aoa mo le malologa masani o le taeao.

Na faataatiaese Taulumaga a le Fono Aoa Faitulafono mo lana malologa masani i le itula e 10:46 i le taeao ma toe faaauau i le itula e 11:25 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono.

Ou te manatu ua sao i alo le taligasua o lenei taeao, ua maua foi le faasiligamalosi e faaauau ai le tatou galuega. Faafetai i le Atua i Lana foai, malo foi le onosai i le tatou Maota.

E faataatiaese a tatou Taulumaga mo le malologa o le taeao ua maea faautagia Lipoti e 2 a Komiti o le Vaega Tau le Tamaoaiga, faapea foi Tali a le Malo e tusa o le faasologa o tatou iloiloga. Ia ma i le taimi lenei ua 6 a tatou Lipoti ua maea, o lea ua tatou sauni atu mo isi a tatou Lipoti e 2.

Ia ma o le avanoa lenei mo se tasi e fia saunoa i Lipoti a le Komiti faapea Tali a le Malo.

Tulai maia lau Afioga i le Taitai o le Itu Agai.

Susuga Hon TUILAEPA FATIALOFA AUELUA SAILELE MALIELEGAOI: Lau Afioga i le Fofoga Fetalai, ou te tulai atu ma le agaga faaaloalo e momoli atu le faamalo, o lea ua maea palegaauau le faasiligamalosi i le mamalu o le tatou Maota nei. Malo faafetai.

O lou tulai atu i Lipoti nei e 2, ou te momoli atu le faamalo i le Minisita faapea foi le Taitaifono o le Komiti o Pulega o le SROS, po o le Fale Suesue leni faapea foi le Komiti a le Palemene sa latou faia le sailiiliga ma aumai ai ni fautuaga. O ni fautuaga taua tele, ma ou te lagolagoina fautuaga mo le faaleleia atili o lea foi itu o le tatou Malo.

Ae i ai nai itu taua e fia oo i ai se faamatalaga. Sa i ai le tatou Fale Suesue foi faapea sa i ai muamua i le tausaga e 1970 ma sa i Alafua, le Alafua Laboratory. Ma e tele lava le aoaoga sa maua mai ai i le Fale Suesue lena, sa faafoe e Dr Padrana, ma o i ina na tatou mafai ai ona maua nisi o oloa fou e gaosi atu i Samoa, e i ai le peepee, ua mafai ona umi ona teumau ae o lo o lelei pea i le taumafa. O i ina foi la na gaosi amata ai le luau tuuapa. I le taimi lea lau Afioga i le Fofoga Fetalai, na i ai foi ma peepee ma mea faapena a isi atunuu e tai pei o Meleisia ma Filipaina. Alu atu loa tatou apa peepee ia, e leai ma se apa peepee a na atunuu na toe taulia, na o tatou lava, talu ai la le formula lea ua maua. Sa ola ai foi la le Fale Peepee leni sa tu i Taufusi, e tele tagata faigaluega sa galulue ai. O le mea ua tupu, ua faasalalau e Padrana le formula, le auala faasaienisi o lea e mafai ai ona togafiti le peepee, o i ina la na salalau atu ai i isi atunuu. E lua la mea na tutupu, ua le gata ina gaosi e isi atunuu le upu peepee, a ua faaoga ma le formula, lea la na iu ina tapuni ai le tatou peepee ua le taulia. Ua fiu foi tatou e tetee atu, a o le a le mea ua faaigoa ai apa ia mai o i Meleisia ma Filipaina o le peepee? Ua latou avea le upu. O le tulaga lena e le i mafai ona galo ia i tatou. Na o le pau lea o le auala ma le agaga tonu lava lea o le SROS, o le Fale Suesue lea, pau lava lea o le auala e mafai ona tatou alofia ai tulafono maati tele ma le malolosi a Niu Sila ma Ausetalia, Quarantine Regulations, e taofia ai le ulufale atu o tatou oloa e ave i fafo, le avatu mata, o talo, o ulu, o mago, fruits. Fai mai o lea e i ai le mea o le lago i totonu o tatou... o le lagovi ea po o le a ea le igoa o le upu? O le lagotui. Ia o lea la na tele ina le avea ai tatou mea. Ma o le mafaufauga lena o lea e faavae atoa ai le mafaufauga na faatu ai le SROS.

O nai a tatou mea la na maua i le taimi o Pedrana, na i ai le tatou peepee, maua ai ma le tatou fagu foi lea sosi feu, e pei lava na o Samoa na maua ai le fagusosi lena, le fagusosi tamato feu. Ma o le lalolagi leni tatou te i ai, e lua lava ituaiga atunuu e faatulaga ai le lalolagi, o atunuu e faalagolago i a latou tupe maua mai mea o fua o faatoaga ma atunuu e faalagolago i oloa gaosi, e le o ni fua o faatoaga e tai pei o Iapani, na o le 14% o le elele o Iapani e mafai ona ola ai ni mea. A o le isi 86% e papa, mauga. Ona omai loa lea avatu minerale i Ausetalia fau ai a latou oloa la faapea.

O le mea la lea na taua ai le Fale Suesue lea, tatou taumafai e toe foi i le mea lea na tupu i le taimi o Pedrana. Lea la na faatu ai loa lea o le tatou SROS, na amata tapena atu i le 2005, ae faamautu le Tulafono i le 2006. Na tatou aumaia ai ma Dr Faale mai Ausetalia, o la e foi e faauluulu i ai le isi Laboratory a Ausetalia, e faauluulu i i e amatalia le tatou Fale Suesue lea. O le isi itu taua o

le Fale Suesue lenei, ua maua ai ma galuega a tatou fanau saienitisi ma taofia ai ma le o atu i fafo. O lea la ua maua le avanoa e galulue ai i Samoa nei. O le a la le mea lea na tupu? E tatou te gaosi ai oloa e le o ni oloa e avemata i fafo, e mafai ai ona tatou alofia Tulafono ia mamafa tele o lo o le lelei mo tatou exports. Ia lea la na mafai ai lea ona maua le tatou falaoamata mai le ulu, maua le suauu e kuka ai taumafa mai le avoka. Maua le uisiki e fai mai le talo, e aoga ai le talo susu, ia lea foi ua fai mai ai ma le isi mea o le fagu e fufulu ai aao mai le siama. Ma o la e foi sa mafaufauina ma isi oloa. O le taimi nei la e pei ona aumai i le Lipoti, o lea foi e faagasolo a latou suesuega i laulaau fofo i le agaga a mafai ona latou maua ni laau fofo i Samoa nei, e mafai ai ona tineia le kanesa ma isi mai leaga, ia o se itu taua lea mo le tatou Fale Suesue. O lea foi la ua tatou iloa e lua lava laau ia ua tele ina faaaoga e Fale Suesue faapenei lea o lo o mix ai isi fualaau, o le esi, faapea foi ma le sasalapa. E tele le malosi o lo o i ai le malosi e faatautee atu ai i le kanesa.

O le faafitauli lea e aumai i le Lipoti, o le tulaga foi lele i le maua pea o a latou seleni e faaaauai ai a latou suesuega, ona sa i ai le mafaufauga a maua mai e latou formula o le gaosiga o lea mea ma lea mea, ona tuu atu loa lea i le tatou aufaipisinisi e o latou faatino ae maua mai sina tatou tamai komisi. Peitai ane, e tuu atu i a tatou faipisinisi, e fefefe foi tatou faipisinisi e fai le mea lea. E manatu latou e i ai le... e ono aafia ai a latou pisinisi pe a fai atu ae le lelei. O lea foi la sa i ai le isi mafaufauga e o e aumai ni nai masini e gaosi ai lava e latou oloa ia, ae faatu sina tamai kamupani a le SROS lava ia e latou te gaosia mea ia ma faatau atu ma maua ai le seleni e faaaauai ai pea latou galuega fai. O lea foi la ou te vaai atu o lea e sau ai le Komiti, fautua mai e le Komiti le tulaga e faaaauai faatalanoaga ma le Ofisa o le Tupe ma Faalapotopotoga i Fafo mo se fesoasoani mo le Faalapotopotoga lenei, tau tupe.

Sa ou vaai foi o faasalalau mai le channel, Medical Channel a le Lalolagi le isi foi a tatou saienisi i le SROS ona o se galuega tele na ia faia ma avatu ai i fafo le tomai leam o lea foi e matua tele lava le malosi lea o lo o i ai i o tatou tagata e fai ai suesuega. Ma o se mea matautia le mea lena, o le sau o le Channel International, o mea o tagata ua maoae a latou suesuega, ae sau ai ma le isi tatou saienitisi ia i galuega o lo o fai foi e ia faatatau lava i mea nei o vailaau.

Ma ou te faamalo i le Minisita ma le latou Komiti, e tataua ona malosi le lagolago, ona o i tonu lava e faalagolago i ai lo tatou atunuu. So o se atunuu lava e faalagolago i mea o faatoaga, e le saosaoa le atinae o le latou tamaoaiga. Aisea? Aua e puleesea mai le lalolagi tau o oloa. A o atunuu e fai lava e latou ma gaosi a latou oloa faapea, e pule lava latou i le tau o a latou oloa.

O le mafuaaga lena o lea tatou te mataituina ai pea atunuu e pei o Korea i Saute, ia, e tai pei o Sigapoa, atunuu laiti uma nei ae ua matua maoae le latou tamaoaiga. Aisea? Leaga e ese mea la e faalagolago i ai, e le o faalagolago tasi i tulaga o oloa mai faatoaga.

Lau Afioga i le Fofoga Fetalai, e faaiu atu lau faamalo i le Komiti, faamalo le galulue, faamalo foi i la outou fautuaga faifaipea mo le uunaia o lea foi Faalapotopotoga a le tatou Malo.

FOFOGA FETALAI: Malo saunoa i lau Afioga i le Taitai o le Itu Agai. Ou te iloa ua aafia uma lava fautuaga taua i le saunoaga a le Taitai o le Itu Agai, ona o lea e talanoa i faiga faavae sa faavae ai. Ou te iloa foi ua leai se isi manatu i lea itu o lea ua atoa mea uma i le saunoaga a le Taitai o le Itu Agai.

Oi, se i tulai mai le sui usufono mo Safata 1, e te le o finagalo malie i le saunoaga a le Taitai o le Itu Agai?

Afioga Leana Ronnie Posini (Safata 1): Leai o lea ua... faafetai i lau Afioga i le Fofoga Fetalai, ua matuai ou malie lava ma le agaga faaaloalo.

Na pau lava lea lau Afioga i le Fofoga Fetalai, se ua alu lava le aso ananafi o ota tulai i luga e faaluaina i mea ia e taua ai foi ma pasia ai foi lea e le matou Taitaifono o le Komiti o le Vaega o Atinae Eseeese, ua ta fiu e tu ananafi, alu ma lenei taeao, e pei e i ai se mea e te le o fialia ai lau Afioga i le Fofoga Fetalai. Ae o le agaga lena e lagolago i la matou Komiti. Ma le agaga faaaloalo.

FOFOGA FETALAI: Talofa e. Ou te faamalulu atu, e sao lelei lava. E pei ua avea le tutu mai o le vaega lea ma mea ua ou le tepa atu foi i le itu lea. Ae ua lelei o lea o le a fai ma ou tepa atu i le itu lea. Faafetai. Malo lava.

Tofa LEALAILEPULE RIMONI AIAFI: Lau Afioga i le Fofoga o le Fono e puupuu lava se manatu, ona o lea e saunoa le Taitai o lenei Itu i vaega i le amataina o le SROS. Ae ou te fia alu lava i le Lipoti lea i se taimi lata mai, e vave lava lau Afioga. Faafetai mo le avanoa.

FOFOGA FETALAI: Ia saunoa.

Tofa LEALAILEPULE RIMONI AIAFI: Faafetai i lau Afioga i le Minisita aemaise o le Komiti. E talitonu tasi lenei Matagaluega talu lava ona ou sau i le Palemene ou te lauga ai lava i tausaga uma. E lelei pei ona saunoa le Taitai o lenei itu i mafuaaga ma le faavaeina e matua talafeagai. Ae o le amataga la sa ou fautuaina le Matagaluega i se mea lea e tau o se commercial division, se latou vaega foi lea e tilotilo i tau o products ia po o mea ia e fia faitino. Aua o le mea lea e tulai mai, e alu le taimi atoa i le faiga o se mea foi lele se product, suesuega i se mea foi lele e tino mai e pei o falaoamata, o pata ma mea ia, ae maea ane, e fai si taugata, fai si taugata. O lea la sa i ai lau fautuaga i na vaiata, e tilotilo foi lele i se feasibility study foi lele se tau o nei mea faitino o le a fuafuaina, ina ia mafai ona fai ae uma ane e mafai ona atiae ma maua ai se atinae tele i totonu o le tatoua atunuu e faaoga ai mea nei. E pei ona tatou talanoa i le falaoamata, ua uma nei ona fai le falaoamata, ae 30 sene le tau o le falaoamata lea mai Fiti, ae le mafai ona meet e le tau o le falaoamata lea tatou. O le isi mea, o le falaoamata lea, aua ua faafia foi ona tatou o i le SROS i aso ia tatou tofo ai i sikoni ma mea uma faapena sa kuka ai, ae manutinuti. O le tala mai e le mafai ona hold lelei, mau le falaoamata, e tataua lava ona moomia se falaoamata lea mai fafo e faaatoatoa ai pe a kuka ai meaai.

O lea la sa ave le fautuaga, pe le tilotilo la i mea ia. Ina ua aumai le uisiki lea mai le talo, na tatou fialia uma lava. A o lea ou te manatua na i ai faamaumauga

o lau lauga i le aso lea, le mea lea na avatu ai le fautuaga. E faapefea ona aumai le tatou uisiki lenei faatau i le tau lenei toetiiti \$200 le tau. O ai la e faataua, o ai la e faataua? Ae lelei le agaga na fai ai. Pe le mafai la ona fai i se mea foi lea e faigofie ona taulia ma affordable mo tagata ma faalatele i fafo. O lea lava tatou te iloa. Aua e le sese lau tala na ma inua ma Loau le isi fagu, uma lelei lava le fagu na ma inua e leai ma se faalogoga. Ia, o le uiga o le tala pei ona ou fai atu, e le pei se uisiki, pei se liquor le taste o le mea.

O le mea la lea i le Afioga i le Minisita ma le... e leai e lagolagoina tele le tatou Matagaluega. Ae le i oo i le isi, na o le lua lava vaega, e muamua lava ona ua pau ia te au ona avatu le faamaisega i le Afioga ia Mataeliga Pelenato Fonoti, le uso foi ua loa lana tautua ma lona sao i le tatou atunuu i le tele o Matagaluega, aemaise o lea e tuua nei le malo o lo o galue ai i i. O le matou feiloaiga mulimuli lava ma le uso, sa ave foi i ai ou manatu ia i le Komiti o Tupe, aemaise la le fesuiaiga lea na fai talu ai nei lava, o le aumaia lea o le Research Division a Faatoaga i i. Ia sa ou tulai foi i lea taimi ma sou vaivaiga, ou te le auai. E ese lava suesuega o le totoina o le talo, ese le suesuega o le faaogaina o le talo. A o le a fenumiai ai galuega faatino ma galuega fai. Sa i ai lava lou talitonuga e taatia pea le Research a le Faatoaga aua e tasi lea mea tele a tatou, le ivitu foi lea tatou te talanoa pea i ai o le Ofisa o Faatoaga i Nuu i le mea na amata mai ai.

O lau fesili la i lau Afioga i le Minisita ma le Matagaluega, o le a la se tala lata mai i le suiga lea na fai po o lelei. Afai o lena e lelei, ia faaauai ai pea, ae afai e le o lelei, ia, o mea uma faapea tatou te faia, aua o le tele lava o mea tatou te faataitaia pe lelei, o le intension lava ia ma le agaga ia lelei. Ae afai atu e le lelei, ia toe faafoi i le mea na i ai.

Ia manuia tele le aso faafetai.

FOFOGA FETALAI: Malo faafetai.

Afioga Hon Loau Solamalemalo Keneti Sio (Sagaga 1): Lau Afioga i le Fofoga Fetalai pe maua se avanoa.

FOFOGA FETALAI: Ia tulai mai leaga o lea sa taua lou igoa i le fagu uisiki.

Afioga Hon LOAU SOLAMALEMALO KENETI SIO: Faafetai. Ua maua foi le avanoa e tulai atu ai ma le ava tele ma le faaaloalo. E sao o lea na taua lou igoa sa ma... na taumafa ai Leala, leaga o au ou te le inu i se uisiki taugofie, na o le mea o le Blue Label lava ou te inu ai. Ui o lea ua maua le avanoa.

O le auga o le faamoemoe pei ona taumafai atu le uso a sui usufono, o le galuega a le SROS, e faafetai atu ai i le Afioga i le Minisita o lo o faaauai. O se auaunaga aupito sili ona taua i le suesuega faasaientisi i laau uma o le vao. A o le faatauga i fafo, leai o le mea lava lena a le tagata ia. A o le mea aupito sili ona taua ia te au o la e ua available i totonu o si o tatou atunuu. O le mea lea e faafetai atu ai i lau Afioga i le Minisita aemaise o lau Afioga i le Taitaifono i le faaauai o lenei auaunaga taua, taua tele le omai o tagata o la e i ai le

aunaunaga, a o le faatauga la i tua o le mea lena a le tagata e fai. Ia ma le agaga e tumu i le faaloalo lau Afioga i le Fofoga Fetalai.

FOFOGA FETALAI: Malo faafetai. Malo saunoa.

Afioga Masinalupe Makesi Masinalupe (Lefaga ma Faleaseela): Lau Afioga i le Fofoga Fetalai...

FOFOGA FETALAI: Tulai mai le sui usufono mo Lefaga ma Faleaseela.

Afioga MASINALUPE MAKESI MASINALUPE: Ia, e tulai atu foi i lenei itula ona o lea ua taua e le sui usufono mo Faleata 2 le tulaga e pei ona i ai le uisiki. Faleata 3. A o lea sa matou tofo lata mai nei lava i le uisiki lea, e le faaleagaina le tulaga e pei ona i ai, o le matua manaia lava, o le matua lelei lava toe manaia. E le o se agaga e fai ina ia matua onā foi lele, a o le manaia i le talatalanoa. E pei o le agaga lena o lea e i ai le... Afai ua le o toe ila ai Leala, ia ua tataua ona lou tino. Manuia le fonotaga.

FOFOGA FETALAI: Malo faafetai. Ia, le sui usufono mo Vaimauga 1, e le o faamalieina lou finagalo i le?

Afioga Sulamanaia Fetaiai Tauiliili Tuivasa: Ioe, leai... o le faataua o le Lipoti a le Komiti.

FOFOGA FETALAI: Saunoa.

Afioga SULAMANAIA FETAIAI TAUILIILI TUIVASA: E momoli ai le agaga faafetai i le Afioga i le Minisita aemaise foi o le Minisita Lagolago, le Taitaifono foi o le Komiti, aemaise foi o le agaga o le faafetai i le Taitaifono o le Board a le SROS ma le Komiti Faafae. E momoli lava le agaga faafetai ona e tasi lenei o Matagaluega a le Malo lau Afioga i le Fofoga Fetalai o le tele o tamalii o le atunuu o lo o faigaluega ai i le maualuluga o faailoga o lo o i ai. E momoli ai le agaga faafetai o lenei itumalo i le faafaeina.

A o le talosaga i lau Afioga i le Minisita, ona o le tulaga lea sa saunoa ai foi nisi o sui usufono i le tulaga lea i le faamatuuina atu o le uisiki ma le falaoamata. E leai se mea e toe oo i ai leaga o lea ua... ae pei sa i ai le agaga pei na o le faatino lava e le SROS ona tuu mai lea i le Malo e sue po o ai latou te faatinoina.

A o le popolega lau Afioga i le Fofoga Fetalai o lenei sui usufono, ona a maitau foi i le Lipoti e pei e 61 laau sa fai ai suesuega a le Matagaluega. Ia e le o po se lilo o le tatou atunuu a alu atu lava lea ua lelei foi le lau sasalapa ia saka, o le lau esi ua saka, e pei e faapena. O le fia feola o tagata i le tulaga i le manaomia o gasegase. Ae o le popolega o lou sui usufono, e manaia lava le fai o se faailoa. O au o lo o ou inu lava i le lau esi, saka lava le lau esi inu, e faapena foi i le laau lea e tau o le monavi, o lo o inu lava. Ae pei o le agaga lena lau Afioga i le Minisita ma le Komiti, e aumai ni laau ua pasia mai le tatou Faalapotopotoga e inu ai, aua o au ia, se i tulou le Maota lenei, o le Paeaiga Lona XVI na pasia ai

le lelei o laau lea o le monavi. O la e la ou te inuina ai lava i le taimi lenei, ae ou te le iloa po o le a le aafiaga. O nisi foi o tagata ua toetiiti lava uma lau o isi laau ua o inu pe a alu atu ae fai mai se taulasea e malosi lou ma'i i le lau faapena, ia o saka. Ae pei o le agaga lau Afioga i le Minisita, ina ia faalauiloa e le tatou Matagaluega laulaua ua pasia aloaia mai uta i le tatou Matagaluega e faatino ai si o tatou atunuu.

Ae momoli le agaga faafetai. Na pau lena o le mea ua tulai atu ai lenei sui usufono o le faatauaina o le Lipoti ma e lagolagoina le Lipoti a le Komiti ua opea nei i luma o le Maota lau Afioga i le Fofoga Fetalai.

FOFOGA FETALAI: Malo faafetai, malo saunoa. Malo. Ia, le sui usufono mo Falelatai ma Samatau.

Afioga LUPEMATASILA GALUMALEMANA TOLOGATA TOGIA TILE LEI'A (Falelatai ma Samatau): Lau Afioga i le Fofoga Fetalai, e puupuu lava se manatu o lenei itumalo. E avatu foi lefaamalo i le Afioga i le Minisita, aemaise o le Pule Sili ma le Pulega ma le tatou Faalapotopotoga o le SROS, e faapea foi le Taitaifono ma le Komiti e ana le Lipoti.

E faataua e lenei itumalo le taumafai e pei foi ona maua i nisi o saunoaga, atiae tatou oloa e mafai ona gaosi i Samoa nei e aveese ai le tatou faalagolago i oloa mai fafo, a o lea e maua atu e fai si taugata o mea e gaosi ai e tatou le uisiki, o le falaoamata ma nisi o mea ua uma ona fai i ai suesuega a le tatou Faalapotopotoga.

Ae pau lava se manatu e faatupu manatu, e tataua ona vaavaai le tatou Malo po o a ni fesoaoani e mafai ona foia ai le faafitauli lea. Atonu e tele lava nisi auuala e pei o tatou lava tax, o tiute, ma tulaga faapena e mafai ona fai e le Malo se faamamaavega ina ia mafai ona sau i lalo le tau e gaosi ai.

Ma le isi foi vaega, ia atonu ai e taugata le tau lea sa aumai i le amataga ona o le tau e gaosi ai le fagu e tasi. Ae a tatou tilotilo i le faiga faapisinisi, e mafai ona tilotilo i le economy of scale, aua o le mea lena e ala ai ona taugofie isi oloa e aumai mai fafo ona e tele le scale, ona tuutiitia lea o le overhead cost e fai ai. Atonu o nisi ia auuala e mafai ona fesoasoani ai i le tatou Faalapotopotoga. Ma le agaga faaaloalo.

FOFOGA FETALAI: Malo faafetai mo le sao foi e tusa ai o le tatou Lipoti. Tulai mai lau Afioga i le Taitaifono.

Afioga NIUAVA ETI L. MALOLO: E malama lava ulugalu i le saunoaga a le Taitai foi o le Itu Agai, e ese le matagofie i le tulaga foi o le talaaga o lenei foi poloketi seia oo mai lenei taimi. E momoli le agaga o le faafetai.

E toafitu i latou sa tutulai foi e tusa o lenei Lipoti. Ia o le tele lava o sui usufono mamalu foi e pei ona tulai, ia o le tuuina mai foi o fautuaga, ma lagolago foi i le Lipoti e pei ona faataoto ai Lipoti e 2 i luma o le Laulau a Fono.

Ae momoli lava le agaga faafetai ia i latou foi sa faauluulu i lenei Faalapotopotoga, i latou foi ua faailagi le folauga, seia oo mai foi i se tasi foi o tamalii o le atunuu ua faapea foi ona faamavae ma le Matagaluega a ua

valaauina foi i isi Matagaluega. Ae seei mai foi le ua avea foi ma Pule o le Faalapotopotoga, e ese foi le matautia, atamamai.

I le maitau a le Komiti i lana iloiloga aemaise foi o lana asiasiga, e tumati'e lava le Faalapotopotoga lenesi. E momoli ai lava le agaga faafetai i le faamaite mea lelei sa amata ai mafaufauga o le faatuina o lenesi foi Faalapotopotoga, faafetai. O tamalii ia e toalua, le tamalii lea le Afioga ia Seuseu aemaise foi le tulai mai o Palauli ia Fiso, e ese le matautia. Ona ou manatua ai lava lea o le tala e fai i Falealili, se o Tama o le Tuasivi e fagogota i tai e lua, ese le matautia o mea o lo o... E molimau lava le Komiti, le Afioga i le Sui Taitaifono ia ma le mamalu o le Komiti na asia, le agai i luma o mafaufauga ma le potu. A o le mea pito sili ona matagofie o alo ma fanau o tamalii o le atunuu, e leai ma se palagi o i ai i totonu. O mafaufauga nei lea e i totonu o le Faalapotopotoga lenesi, e momoli ai le agaga faafetai i tamalii sa tauavea lenesi Matagaluega.

Ia a o se laolao foi e avatu ai foi faamaisega i se tasi foi o Tamalii o le atunuu. Na matou mafuta i le omaiga a le Matagaluega muamua peitai o le matou mafutaga mulimuli nei e valaau atu ua le oo mai le Afioga ia Fonoti, ai o faataotolia i le taimi lea. Ia faamafanafana le Atua i le faletua ma le nofo a alo i le tuua ai o le mafutaga ma le tama aemaise foi o se tasi o tamalii na sasaa lona potu ma lona atamai, o lona malosi e tautua ai le Malo i le Matagaluega.

O le tulaga i whiskey, sanitizer, o laulau, lau kuava, lau vi, ua taoto uma faamaumauga. Aemaise o le taumafaiga foi lea ina ia i ai le vave foi lea i le mea lea o le intellectual knowledge ia ma le mea lea patent o tatou suesuega nei ma oloa. O lea ua maea uma ona tapena ua maea foi ona galulue ma le Afioga i le Loia Sili e fai foi le fautuaga ina ia malupuipua ai a tatou oloa nei ma taumafaiga a le Matagaluega.

E alu atu le matou asiasiga muamua a o seei mai le Afioga Seuseu, matautia foi le tele o masini, e taugata e le taugofie. Pau lava lena o se sasi o le Afioga Seuseu i lena vaiata, matou o atu i totonu o le Lab o lo o fai ai le test o mea nei o le whiskey ma... Matou te oatu la e tele a la i luga o le Laulau ia tamai ipu foi ia, mo beakers e fai ai test, ia ua uma lava la ona faatulaga mai le whiskey e tofo e le Komiti. Peitai ua uma ua savali mai i fafo le Komiti ae faatoa maua ane, o le hand sanitizer le mea lea na tofo e le Komiti. Ou te iloa o le mea la lea o lea ua... lea e faapea ai Leala ua le ila o lona uiga e le o se whiskey o le hand sanitizer le mea lea sa...

Ae faafetai tele i le Matagaluega i le tulaga i le faatinoga o galuega, matagofie. Alu atu le matou asiasiga mulimuli nei la ua galulue le isi latou poloketi lea o le... aua o le tasi lenesi o faafitauli i le tatou renewable energy, mea nei o malosiaga e alu i le la o le mea o le storage. A o le taimi lenesi la ua galulue ai se tasi foi o tamalii o le atunuu e fai le maa, e fai lavainei Samoa, ae fai mo mea o scrabbles foi na e la e i ai, matagofie ia.

A o le faamatalaga la na aumai i le Komiti e 100 tausaga le lifespan e ola ai le maa lea. O le mea lea e momoli ai le agaga faafetai i le tamalii foi o le atunuu aemaise foi o le tatou Malo. E masalo o se taimi ona tali lea o le Afioga i le Minisita e sausaunoa foi i le tulaga ua faataoto i ai le agai i luma ma nisi Poloketi o le a faapea ona agai i ai le tatou Faalapotopotoga lenesi.

Ae momoli lava le agaga faafetai, i le tulai mai foi o Palauli lau Fetalai Fiso aemaise foi o nisi o Polofesa o le Faalapotopotoga, ia maua pea lo outou lototetele e lagolagosua foi i le Afioga i le Minisita aua foi lenei Faalapotopotoga taua a le tatou atunuu.

E momoli foi le agaga faafetai i le matou Komiti, le Afioga i le Sui Taitaifono le Afioga ia Lautafi, ia e le tau selu atu le sui usufono matua o le Palemene ia ae o tama foi na mua i aiga o Samoa. O le Susuga ia Lufilufi, ia o ulusina ia. Tuu ia matou e fou i totonu ia ae o latou nei o lo o tilotilo i ai le Komiti e solisoli mulivae foi i la latou tofa, manaia ai le faagasologa o galuega. E momoli ai le agaga faafetai ia te au nei o le Taitai o le tatou Komiti, i le tatou Komiti.

E faamalo foi i le Afioga i le Minisita i galuega foi ua molimauina aua le agai i luma. Manuia le Matagaluega o lo o i ai Lipoti, manuia le Afioga i le Minisita, manuia lau Afioga i le Fofoga Fetalai, manuia le Fonousu a Samoa.

FOFOGA FETALAI: Malo faafetai, tulai mai lau...

Afioga Fuaava Suluimalo Amataga (Aleipata Itupa i Luga): Lau Afioga i le Fofoga Fetalai faamolemole, o le Sui o le Komiti.

FOFOGA FETALAI: Oi, ia...

Afioga FUAAVA SULUIMALO AMATAGA: O nai mea e fesoasoani foi i si a matou Taitaifono pei ona taua foi i nisi o lauga i lenei taeao. Faafetai mo le avanoa, faafetai foi i le matou Taitaifono aemaise foi o sui usufono mamalu na faaalua o latou finagalo i le matou Lipoti. Ona o lea ua taua le tulaga foi lea o le patent ina po o le faamaumauga lea faale-Tulafono o mea ua ausia e le SROS. O lau iloa o le isi matatia lea toetiiti a maua, o lau iloa o le lau kuava, atonu o lea e alaala mai le Ofisa o le Loia Sili. Ae pei a ua muamua i ai Saina i le patent ina lea o le a foi... kusa o le copyright foi lele o le faiga o le lau kuava e fesoasoani i le mai suka ma le mai kanesa, obese ma tulaga faapena.

Sa faamalosiava lava le matou Komiti i nisi laulaau ia taumafai ia vave ma fai lelei sailiiliga, ia uma ane... aua e tai pei a o le mea lea na tupu i le peepee, i le tamaloa foi lele o Padrana aua ou te iloa o ia lea na patent ina le mix ina o le peepee. Ia, maua loa ana tupe faatau loa ia Asia alu atu ai ma le igoa ae leai se tupe a Samoa o maua ai. Ae o se mea taua lena foi lele, lea e taumafai i ai le SROS ma tulaga faapena ia aemaise o le tulaga foi lele o le taugata. Ou te iloa o le taugata ona o lea e fai mo mea o trials foi lele, ae a fai loa le mass production lona uiga e matua lau mai ni mea se tele. O lea foi na saunoa i ai le sui usufono o Falelatai, ou te iloa a tatou vaai foi i Farm i fafo toetiiti pei o le Motu o Upolu se Farm ina ia tele le production. Ou te iloa foi o i ina o le a pa'u ai i lalo ia le tau, leaga o le mea lea e fai e tatou na o nai tamai mea foi ia, tamai masini na ona fai ai o test ina ia faamaonia ma atoatoa ona ave loa lea i tua i le Private Sector.

Ae pei o nai mea ia e avatu ai le agaga faafetai. O lea ua saunoa le matou Taitaifono e faafetaia ai foi tamalii o lo o taitaia lea Faalapotopotoga aemaise foi o alo ma fanau a Samoa. Ua faatupulaia qualifications, ua tele Doctors la ua

i ai i totonu ae na amata pei lava na o le Afioga ia Faale lea sa amata ai. Ae o le taimi lenei ua toatele ua agai i fafo e fai Masters ma PhD, ia o le faatuputupulaia foi lena o le lelei o lenei Matagaluega ma le Faalapotopotoga ma le agaga faaloalo, faafetai.

FOFOGA FETALAI: Malo faafetai, malo saunoa i sui usufono mamalu o le Komiti.

Ia lau Afioga i le Minisita, tulai mai lau Afioga.

Susuga Hon LAAULI LEUATEA POLATAIVAO FOSI: Faafetai i lau Afioga i le Fofoga o le Fono mo le avanoa e tuuina atu ai se Tali a le tatou Malo ia po o lenei foi Faalapotopotoga e ala i fautuaga aemaise foi saunaoga ua opea i le Maota. E momoli le agaga faafetai i le tatou Komiti, lau Afioga i le Taitaifono ma la outou Komiti mamalu ona o le tou fautuaga lea ua aumai i le tatou Pepa 158, 4 tou fautuaga 4 tali lea ua avatu. Tou Pepa 109, 3 tou fautuaga 3 tali ia ua avatu... O le tali puupuu a le Malo, ua lelei o le a fai.

Na o si mea laitiiti lava lea e faapulapula ma faamalamalama ona o le taua o le mea lea ua laga i le taeao lenei. O le a le isi laasaga tatou te toe ave i ai le SROS. Ua ova ma le 15 tausaga talu ona faavae, peitai o lea tatou te i i lava i le level lea ua na o le Research lava. A o le auga o le SROS, research and development. O lea la ua i ai fuafuaga fou ia ua faatulaga e le tatou Faigamalo, tatau loa ona tatou lalaa atu i le isi laasaga e ave uma i ai tatou suesuega ia e fai.

E pei ona outou silafia e le na o meataumafa e suesue i uta, e suesue uma ai le siosiomaga, suesue ai le Soifua Maloloina, suesue ai le tulaga o laautoto, suesue ai ma oloa gaosi e toe maua ai isi oloa fou. Peitai ua ova ma le sefulu ma ona tupu tausaga e lei loa po o fea e ave i ai mea ia. O lea foi ua saunoa le la itu o le Maota, tuu atu i tua i le tatou Private Sector. O le taimi lenei e le i i ai ma se tasi ua na faaaogaina formula uma nei na fai, e faaaoga e faapisinisi. Aisea? Tele ia o le papamaa lea e tu mai luma, aua foi e le na o le fai o suesuega ona tuu mai loa lea i i, that's the end product, leai, tele ia o le mea e tatau ona fai.

E le faalagolago na o le SROS e faia le mataupu lenei seia tini. Muamua e faalagolago i le tulaga o suesuega, a uma ona maua le product maua le tulaga o le a faatau atu i fafo ona liliu mai loa lea i le tatou Va-i-Fafo, Foreign Affairs. O latou nei e latou te faagaoiina uma tulaga o feutagaiga pe faafefea ona avatu tatou oloa nei i totonu o Borders a isi atunuu. O lo o i ai ia feutanaiga Faava-o-Malo i le trading i ina e talia ai e atunuu nei tatou oloa. O i ina foi o lo o fua ai le pasene e taunuu ai tatou oloa nei pe a taunuu i borders a atunuu. O lona uiga e matua tele foi le sao a le Foreign Affairs e talanoaina ai oloa uma nei ua fai e tuu atu i le faitotoa, e oo lava i fafo i le maketi la ei fafo.

O lona lua, o le Trade. O le tele ia o fefaatauaiga ma aiaiga ma Tulafono ua uma ona tatou fausia i mea tau faafetauaiga i le va ma Malo i fafo. Peitai, tele foi le to'a o na mau Tulafono ua felavasa'i solo ai le avatuina o tatou oloa e ave i atunuu mamao. Peitai o le mafaufauga lea sa faatulai mai i le taimi lenei, lea sa taua foi ananafi na tatou talanoa ai, ua tatau ona i ai se itutino feagai tonu lava ma oloa avatu i fafo. O lea ua fanau ai le tatou Export Authority lea sa taua.

O lea foi na ou faamatala ananafi, faamatala i le tulaga na o exporter tau faatoaga. Ae o isi exporters, o exporters la ia o mea ia tatou te talanoa ai. E faapefea ona ave le tatou falaoamata ulu? It's a product, ua uma ona fai e faatau atu i le maketi e ese foi lona tau, e le faatusatusalia ma le falaoamata lea tatou te talanoa ai, falaoamata i aso faisoo. O le weed foi lea na ona aumai a palu fai, e ese le level o le tatou prime product lea leaga e ese lona gaioiga ma le value e faatau ai. A taugata la sala ina taugata, leaga o i e iai le organic certification ia ma tulaga uma e iai lona tau siitia ua gagana ai tagata e fia taumamafa i mea o organic and gluten free, lea e ala ai ona mafua ona oo a tatou tau i tulaga ia. Ae pei ona ou taumafai e faapulapula atu o le mafaufauga lea ua aumai nei i totonu o le tatou mataupu leni, galulue faatasi le Export Authority, Foreign Affairs ma le Trade ia ona mafai loa lea ma faigofie uma le gaosiga. O a uma ituaiga oloa nei o le a gaosi e le tatou SROS ia ona tuu atu loa lea i aao o i latou, ua latou maua le tupe, ua latou maua le fesoasoani ma latou maua uma le agavaa ma mea uma e fau ai a tatou oloa nei ma auina atu i atunuu mamao.

Atonu o se mea fou, leaga o lea faatoa tatou tau faatulaga le itutino e maua ai le auala e aveina atu ai oloa i fafo. Aua a omai atunuu mai fafo talanoa mai i le tatou Foreign Affairs, matou te manaomia ni oka ia e avatu, talanoa loa ma le Trade gata ai i luga i ina. A o le mea e oo i lalo i tagata ia e tataua ona latou iloa oloa la e manaomia mai fafo, e le o oo le information lena i lalo i i. O lea la e taumafai atu nei e faatulaga le auala fou leni ua tatou faatulaga atu i le tatou Export Authority, latou te gafa ma mea uma tau... So o se oloa o le a tatou tapena e ave i atunuu i fafo, o le latou matafaioi ia kilia le pathway, kilia le biosecurity, kilia le bylaws o isi atunuu. Faataugofie le tiute pe a enter tatou oloa i totonu o borders o atunuu uma nei e taumafai e ave ai ia tatou oloa.

Lona lua, o le mea tau health, ia na ua outou silafia, pipisi nei le Koviti, leai se mea na ave ai tatou tests, seiloga e faatietie tests faatoa ave i Niu Sila, faatoa maua mai ua e maua i le Koviti. Le a le capacity lea ua i ai le tatou SROS? Ua mafai ona test iinei. Lea ua tauave nei e le SROS, le falemai lea o le Medcen, o ina o lea ua fai ai le laboratory e vaavaalua ma le Matagaluega a le Soifua Maloloina e fai uma ai a tatou tests, blood test, o a uma isi ituaiga test, DNA ma mea uma faapena ina ia mafai ona fesoasoani aemaise ai o le tatou taumafai i le fualaa faasaina lea e vevesi i le taimi nei. O lea foi e taatia le lafo a Lualemaga i le Afioga i le Minisita o Soifua Maloloina pe faamata e mafai na fai tatou drug test iinei. O le tali e mafai. Ua mafai e le Matagaluega o Suesuega Faasaienisi ona latou sailia pe a faapea ua masalomia se tasi. E mafai ona faatulaga ai le tulaga o mea tau test i mea na.

O le mea mulimuli o le tatou laulaau. Sa tau autago le silasila a le Matagaluega ae ou fautua iai, "O e aumai ni information i tatou taulasea Samoa." E le fou le mea leni i tatou taulasea Samoa o lo o i ai le tomai faalenatura ma tatou taulasea sa masani ai. Lea la latou te iloa ai uma a laulaau eseese sa tatou feola ma tatou cure ai, amata ina le suesuega. Ma ou te fiafia e tau atu o loo faasolosolo pea i luma le aoina uma o tatou laau eseese e mafai ai ona maua le isi cure, herbal cure, e agai sao e fesoatai ma le Matagaluega ina ia pasia lelei. Aua nei laasia le medicine lea e protect ai e le... e le Soifua Maloloina gasegase.

A o le herbal, it's a natural herb treatment lea e mafua ai ona maua le isi fesoasoani sili mo tatou suesuega faasaienisi.

O le aotelega i lau Afioga i le Fofoga Fetalai, ou te faaleoina pea le agaga o le faafetai i lenei Matagaluega. Mai lava i le sa amataina, ua fai i lagi le folauga le fetalaiga ia Matautu Faamoetaulua Faale, seia taunuu mai i le Afioga ia Tilafono, seia taunuu mai i le Tofa ia Seuseu, seia taunuu mai inei ia Fiso, Palauli. Ia, e lagona a le agaga faafetai. O le Matagaluega lenei e pei ona saunoa sui usufono na o tama fanau a le atunuu ma e matua ou lagona le agaga faafetai ona o le latou tomai, galulue faamaoni, ma le tinou ina ia tau lau o le tatou faamoemoe. E faamaise foi i se tasi foi o tamalii ia Lupeomanu sa tatou galulue faatasi ae o le auga atoa lea o le Matagaluega e manuia.

O upu faaii i lau Afioga i le Fofoga Fetalai, o le faamoemoe lea ua i ai o le development. Ua lava ma totoe mea tatou te research ma tatou vaai i mea ua maua. A o le taimi lenei, ua tataua loa ona tatou tilotilo i le isi laasaga ia develop oloa nei ua fai ina ia maua ai le tamaoiga o le tatou atunuu. E momoli le faafetai tele i lau Afioga i le Taitaifono ma la outou Komiti. Faafetai mo lou avanoa.

FOFOGA FETALAI: Faamalo faafetai i lau Afioga i le Minisita mo le faamalamalamaina atili foi o finagalo o le Maota aua lava le tatou Faalapotopotoga o le SROS. Ia, malo lava faafetai mo le atinaeina aemaiseai foi o le agai i luma. Tulai mai lau Afioga i le Taitaifono mo le lafo.

Afioga NIUAVA ETI L. MALOLO: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le:*

1. P.P.2022/2023 Nu.109, Lipoti a le Komiti o le Vaega Tau le Tamaoiga i le P.P.2020/2021 Nu.77 ma le P.P.2021/2022 Nu.18. Lipoti Faaletausaga a le Faalapotopotoga o Suesuega Faasaienisi a Samoa mo Tausaga Faaletupe 2019/2020 ma le 2020/2021.
2. P.P.2022/2023 Nu.158. Lipoti a le Komiti o le Vaega Tau le Tamaoiga i le P.P.2022/2023 Nu. 89. Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faaletupe 2021/2022.

Faaluaina e le sui usufono mo Satupaitea ma le sui usufono mo Faasaleleaga 2.

Na faamaonia le Lafo.

FOFOGA FETALAI: Ou te tapa lau Afioga i le Minisita mo le lafo.

Susuga Hon LAAULI LEUATEA POLATAIVAO FOSI: Lau Afioga i le Fofoga Fetalai ou te faatu le lafo, *Ina ia faamaonia e le Palemene Tali a le tatou Malo aemaise o le Lipoti a le Komiti o Atinae.*

Faaluaina e le Sui Palemia, Minisita mo Galuega, Felauaiga ma Atinae Eseese, Minisita mo le Soifua Maloloina ma le Minisita mo Leoleo ma Falepuipui.

Na faamaonia le Lafo.

6. P.P.2022/2023 NU.112, LIPOTI A LE KOMITI O VAEGA TAU LE TAMAOAIGA I LE P.P.2020/2021 NU.66 MA LE P.P.2022/2023 NU.31, LIPOTI FAALETAUSAGA A LE PULEGA O TAGATA TAFAFAO MAIMO A MAI FAFO A SAMOA MO TAUSAGA FAALETUPE 2019/2020 MA LE 2020/2021 - ILOILOGA

6.1. P.P.2023/2024 NU.29, TALI A LE MALO I LE P.P.2022/2023 NU.112

7. P.P.2022/2023 NU.113, LIPOTI A LE KOMITI O LE VAEGA TAU LE TAMAOAIGA I LE P.P.2022/2023 NU.42, LIPOTI FAALETAUSAGA A LE MATAGALUEGA O MATAUPU TAU LE VA I FAFO MA FEFAATAUAIGA MO LE TAUSAGA FAALETUPE 2020/2021 – ILOILOGA

7.1. P.P.2023/2024 Nu.22, Tali a le Malo i le P.P.2022/2023 Nu.113.

FOFOGA FETALAI: Tulai mai lau Afioga i le Taitaifono o le Komiti Tau le Tamaoaiga.

Afioga NIUAVA ETI L. MALOLO: Lau Afioga i le Fofoga Fetalai ou te faatu le lafo, *Ina ia faautagia e le Fono Aoao Lipoti e 2 a le Komiti o le Vaega Tau le Tamaoaiga o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mo Satupaitea, sui usufono mo Falealili 2 ma le sui usufono mo Faasaleleaga 2.

Na faamaonia le Lafo.

FOFOGA FETALAI: Ou te tapa lau Afioga i le Tamaitai Palemia.

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faautagia e le Fono Aoao le Tali a le Malo e faatatau i Fautuaga o Lipoti e 2 a le Komiti o le Vaega Tau le Tamaoaiga.*

Faaluaina e le Sui Palemia.

Na faamaonia le Lafo.

8. P.P.2022/2023 NU.98, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2020/2021 NU.70 MA LE P.P.2021/2022 NU.48, LIPOTI FAALETAUSAGA A LE MATAGALUEGA A LE PALEMIA MA LE KAPENETA MO TAUSAGA FAALETUPE 2019/2020 MA LE 2020/2021 - ILOILOGA

8.1. P.P.2023/2024 NU.62, TALI A LE MALO I LE P.P.2022/2023 NU.98

9. P.P.2022/2023 NU.46, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2020/2021 NU.136 MA LE P.P.2021/2022 NU.39, LIPOTI FAALETAUSAGA A LE OFISA O LE KOMESINA O SULUFAIGA MO TAUSAGA FAALETUPE 2019/2020 MA LE 2020/2021 - ILOILOGA

9.1. P.P.2023/2024 NU.78, TALI A LE MALO I LE P.P.2022/2023 NU.46

10. P.P.2023/2024 NU.86. LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2023/2024 NU.12, LIPOTI FAALETAUSAGA A LE KOMISI O GALUEGA A LE MALO MO LE TAUSAGA FAALETUPE 2021/2022 - ILOILOGA

10.1. P.P.2023/2024 NU.119, TALI A LE MALO I LE P.P.2023/2024 NU.86

FOFOGA FETALAI: Tulai mai lau Afioga i le Taitaifono o le Komiti o Tulafono Tumau ma Mataupu Tau Faiga Palota.

Afioga AUUAPAAU MULIPOLA ALOITAFUA MULIPOLA: E momoli le faamalo i lau Afioga i le Fofoga Fetalai. Faamalo le pale faamalo le folau. Lau Afioga i le Fofoga Fetalai ou te faatu le lafo, *Ina ia faautagia e le Fono Aoa Lipoti e 3 a le Komiti o Tulafono Tumau, Mataupu Tau Faiga Palota Talosaga ma Tofiga Faale-Faavae o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mo Gagaemauga 2, sui usufono mai Gagaifomauga 2 ma le sui usufono mai Faleata 1.

Na faamaonia le Lafo.

FOFOGA FETALAI: Ou te tapa lau Afioga i le Tamaitai Palemia.

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faautagia e le Fono Aoa Tali a le Malo e faatatau i Fautuaga o Lipoti e 3 a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae.*

Faaluaina e le Sui Palemia ma le Minisita mo Faatoaga ma Faiga Faiva.

Na faamaonia le Lafo.

FOFOGA FETALAI: Ia, o lea ua maea faautagia e le Fono Aoa Lipoti e 5 a Komiti Faapalemene e faapea foi Tali a le tatou Malo i Fautuaga a Komiti.

Ia, o le avanoa leni o sui usufono, mo se finagalo foi aua le tatou Lipoti o lo o faataatia i le Laulau a Fono.

Oi, ia malie lau Afioga i le Taitai o le Itu Agai leaga o la e ua muamua mai le sa o le Sui Usufono Tamaitai... le Sui Usufono Tamaitai mai le la itu o le motu.

Afioga ALIIMALEMANU MOTI MOMOEMAUSU ALOFA TUUAU: Ia, faafetai i lau Afioga i le Fofoga Fetalai mo le avanoa. Ia, o le a fai se manatu agai i le lipoti a le... Ona o lea e lima a tatou lipoti lea e talanoa faatasi ae fia fai se manatu i le Lipoti mo le Pulega o Tagata Tafafao Maimoa mai Fafu i tausaga ia e lua 2019/2020 ia ma le 2020/2021. O le agaga lava ia o le faafetai, faafetai i le Komiti mo le Lipoti maeaea ma le auiliiliina atoa o matafaioi. Ia, o galuega na ausia ae faapea foi nisi o luitau o lo o feagai ma le tatou Ofisa lea po o le Matagaluega.

O le agaga faafetai o lea ua maua tonu ai i le Lipoti a le Komiti vaega ia o tatou stimulus package lea na ave ai le tatou fesoasoani i le vaega ia o faletalimalo lea e taua le \$72.2 miliona vaegatupe na totogi atu i tatou polokalame ia ae faapea foi le isi miliona o faalauiloa e tali atu ai i aafiaga a le Koviti 19. Ia, o lea foi e toe maua mai ai ma nisi foi o fesoasoani lona lua sa fesoasoani ai mo tagata faigaluega lea sa faapea ona faamalolo mai i galuega i lea vaiata ona o le Koviti-19. O le agaga faafetai o lea e vaai atu i fautuaga, o lea e matagofie le tali mai o le Ofisa o le Tamaitai Pule, ia o le tatou Ofisa o Turisi aemaise lava le tulaga lea o mea tau tupe. Lea e i ai le fautuaga lona lima lea ia faamauina ma faamanino ma ni asiasiga ina ia mautinoa ai o lo o lelei ma mulimulitaia aiaiga o fesoasoani nei a le Malo. Faafetai i le Pulega a le Turisi mo le tali lea e taua mai le Tali a le Malo i lo latou tulituliloa pea o le aumai o Lipoti nei ma lisiti e faamaonia ai le faaogaina o nei fesoasoan, aemaise foi le Komiti Faafu mo le asiasia o le faaogaina o nei fesoasoani sa avatu i a tatou faletalimalo i le vaiata o feagai ma Faama'i.

O le agaga faafetai i leni vaiata i le siitia o tagata femalagaai o le tele ia o la matou maitau i le eseese o faalauiloa ua i ai, le matagofie o faalauiloa i le faalauiloaina o Samoa i leni vaiata i galuega a le tatou Ofisa lea o Turisi. E le gata foi i lea ua matauina lava le faaleleia o le tele o faletalimalo e asiasi atu i ai, pe ui lava na o le asiasi i ai na o sina afa itula. Ae o le agaga fiafia lena o le toe re-build ina o lea itutino po o le vaega lea o a tatou atinae, pau lau fesili lea e fai i i le tulaga i le Lipoti lea a o le aotelega ia o le agaga faafetai.

O le tulaga lea i le tatou paka lea e i o i Ae lea sa alu ai le tele o tupe ae o lea ua faapea ua faamatu atu i le Matagaluega o Faatoaga ma Faiga Faiva. Ia e pei o se fesili po o a la ni faamoemoega o le a fai i i le paka. Pe o le a fuafua loa mo galuega a le Matagaluega o Faatoaga ma Faiga Faiva, po o le mea o le a tuu

ia i latou e latou te faatino ma faaauauina fuafuaga sa fuafua mo la tatou paka lea i AeLe.

Ma lona lua loa lau Afioga i le Fofoga Fetalai ona oo mai lea i le tatou Lipoti lea o le Matagaluega o le Va-i-Fafo ma Fefaatauaiga 2020/2021. O lea e maitau atu faafetai, faafetai i le Komiti aemaise foi o le tali mai ona o le tulaga lava lea e maitauina i le Matagaluega lea, e aumai lava i latou Lipoti i tausaga uma le le lava o le latou aufaigaluega. O lea foi la ua aumai ai fautuaga ina ia maua ni faamanuiaga mo le aufaigaluega ina ia mafai ai ona faatino a latou galuega aemaise o le vaitaimi e ono lofia ai le atunuu i ni faalavelave ma faamai. Ia ae faafetai e maitau o lea ua tali le Malo o le a silasila i ai i lea tulaga, ona matou te maitauina foi e matou o le faafitauli lava lea e feagai pea ma le Ofisa lea.

O le agaga lea o le tulai, e tasi le fesili ma le agaga faafetai i le Lipoti, faafetai i le Komiti, faafetai mo lo matou avanoa.

FOFOGA FETALAI: Malo saunoa i lau Afioga i le Sui Usufono Tamaitai mai le Alataua i Sisifo, faafetai mo lou sao i le Lipoti a le tatou Komiti.

Ia tulai mai le sui usufono mo Vaimauga 1.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai e momoli le agaga faafetai i le Lipoti ua opea i le Maota, ae fia faia se manatu muamua i le Komiti o le Vaega Tau le Tamaoaiga.

E momoli le agaga faafetai i le Taitaifono aemaise foi o le Faauluuluga o lea foi Matagaluega i le maimoa mai fafo o tagata. O nai fautuaga ua aumai e avatu ai se agaga ona o le fautuaga lua i mea o taumafai i mataaga. E momoli le agaga faafetai, ona ua afea foi tulaga ia i mataaga. Aua o le fesili la lea e tuuina atu ona o leni foi itumalo o le tele ia o mataaga o lo o i tuamaota ae le mafai ona agai i ai turisi pe a... ona o le leaga o auala.

O le itumalo nei o le Vaimauga o le tele ia o Papa. O le Papa i Galagala, o le Papa Soifua o le Papa o le Faatolotologatama ia o Tiitiatalaga, o le papa o ... ae o le faalavelave e le mafai ona o i ai. Ae lagolagoina e leni itumalo lau Afioga i le Fofoga Fetalai pe a faapea la e fai e le Malo e ala mai i le Matagaluega ia auala e oo ai i mataaga o lo o i tua o leni foi itumalo. E momoli ai le agaga faafetai e momoli foi le agaga faafetai o leni itumalo i le Ofisa o Turisi, e le o po se lilo o lo o faamanuiaina pea leni itumalo lau Afioga i le Fofoga Fetalai i meli o lo o auina mai ma o atu faafiafia i si o matou afioaga ma maua ai nai tupe.

E le gata foi e o atu i afioaga ae o atu foi alo ma fanau a leni itumalo e sisiva ai i le taimi e taunuu ai le meli ma sisiva atu i fafo. Ae o sina tamai taimi lava e sisiva ai ae maua le \$2000 i le 5 minute e lagolagoina ai le tulaga i le Komiti o le Tamaoaiga, Taitaifono.

O lona lua o le... e momoli le agaga faafetai i le Lipoti a le Komiti o Tulafono Tumau i le Afioga i le Taitaifono ma le Komiti aemaise foi le Afioga i le Tamaitai Palemia. O le faanoanoaga o leni sui usufono lau Afioga i le Fofoga Fetalai, a silasila i le Lipoti a leni Komiti pei e toatolu pe toafa sui usufono ia e le o saina i le Lipoti. E pei o le faanoanoaga lena o le Maota leni e tataua ona saina uma sui usufono ua autasi mo mea o Lipoti e tuuina mai. Ia a o lea e maua,

o le tele o sui usufono ia pe toatolu lea e le o sainsi ai e lagona ai le faanoanoa o lenei sui usufono po o le mea e tetee i le Lipoti po o le lē lagolagoina o le Lipoti.

A o le fautuaga o lo o tuuina mai i le tou Lipoti i le Fautuaga 2, i le tulaga i le toe silasila i mea o declaration form foi na le e taunuu mai ai i le malaevaalele. E le o po se lilo i le silafia o lenei Maota a tatou afifio atu i Niu Sila, e pei tatou te o atu e na o le Custom lava e faafeiloaia tatou, e siaki lau pepa e le Custom na e toe foi lea piki lau ato. Pau a le mea e leai se Immigration pei o le mea lea e i ai tatou i nei a e afio foi i atunuu mamao e te alu atu o le staff a le Immigration ia ona faapena lava. E oo foi le taimi e taunuu mai e stamp e le Immigration ona toe oo mai foi laia faatoa maua le Tiute. Ae pei o le agaga lena i le form lea e faatino o lo o i ai le faa-Samoa ma mea faapena, ae pei o le fautuaga a le Komiti ina ia toe silasila i le form.

Ae a silasila i le form a lelei lava le faatinoina o le form lea e maua uma a o tatou tagata e foi mai totonu ia ma isi foi e malaga atu i fafo, aua o le aoga foi o le form lea po o le declaration form lea e faatumu e maua ai foi nisi o tulaga i nai o tatou tagata ia, lea foi na aumai le isi isi faamatalaga lea e o atu i fafo i nai o tatou tama matutua. E maua uma la i le form lea pe a faatino ae avatu foi ma le talosaga a lenei itumalo pe le silasila le faigamalo i se tasi foi o se faamalu ina ia mafai ona, pei a tatou vaai faatoa appear lava le Immigration i le taimi e i ai ni faafitauli ae handle uma lava e le Custom le area lea i le taunuu atu.

O le tulaga foi i le tatou taunuu atu i fafo i le tele foi o lena itu e malaga ia e faapena, e o atu lava faasino mai pe i ai ni mea e declare, ia ona o lava lea o le vaega i le greenlane ae o isi faapena. Ae pei o le tatalo lena e avatu ai i lenei Komiti ia o lo o lelei le form vagana ai nisi tuutuuga i le fautuaga lona lua lena.

E pei o nai manatu laiti na e avatu i le Komiti ma lou faaaloalo lava lau Afioga i le Fofoga Fetalai.

FOFOGA FETALAI: Ia malo faafetai malo le saunoa i lau Afioga...

Afioga Aiono Tile Gafa (Aana Alofi 2): Lau Afioga pe maua se avanoa? Oi...

FOFOGA FETALAI: Ia tulai mai lau Afioga i le Taitai o le Itu Agai o lea ua tuu mai le avanoa e le sui usufono mo Aana Alofi 2.

Tulai mai lau Afioga.

Susuga Hon TUILAEPA FATIALOFA AUUELU SAILELE MALIELEGAOI: Lau Afioga i le Fofoga Fetalai ou te tulai atu foi au e lagolago taumafaiga uma o lo o fai ina ia atili toatele ai ma tupu tagata asiasi mai. O le atinae pito tele lea i atinae uma lava tuufaatasi o lo o maua mai ai le tatou Foreign Reserve ma fesoasoani foi i le tulaga o le faatupulia o isi pisinisi ma isi atinae o tagata e omai ma faaalu a latou tupe i Samoa nei. E le o se tulaga faigofie lau Afioga le amatamata mai o le atinae lenei. O lea ou te manatua taumafaiga sa i ai ma manatu sa faaalua amata mai lava i le taimi faatoa tutoatasi tatou. O manatu sa i ai o le atinae lenei o turisi o le atinae lea e tataua ona aloaloese mai ai Samoa ona o le a afaina ai ana tu ma ana aganuu e... o le a

omai tagata i fafo ma tumutumu i Samoa nei ma atili ai ona agai i luga le tau o le soifuaga.

Ma na iu lava ina fai ai le tatou ata ma tatou tauva ai i le tausaga e 1971 i faaaliga ata na fai i Singapore a le Barter Conference, na ave ai lea o le tatou ata. O igoa o le ata o le Best Kept Secret. O le agaga atoa ia aua lava ne i faaaliali Samoa i atunuu i fafo o se mea lilo e tatau ona ufiufi ma nana a tatou tu ma a tatou agaifanua, ina ne i te i ua afaina i le toatele o tu ma aganuu a tagata e omai e tafafao mai i Samoa. Na iu lava ina tusi mai le isi tagata e fia fai sona faletalimalo. E leai se tali. Sau loa le faipisinisi lenei mai Amerika e faatalanoa, na ou manao ou te tusi mai o au o le retire official ua ou sau ou te faaalu au tupe sa teu e fai ai sina ou tamai fale ou te nofo ai ma ou oti ai i le Pasefika. Na ou tusi mai ai i atunuu uma o le Pasefika Islands, ae tasi lava le atunuu e le i tali atu o Samoa. O le mea la lea na ou lele mai ai e fesili pe aisea ae tali le Faauluuluga o le tatou Turisi, “e sa’o, na ou musu ou te tali atu ou te le manao i tagata pei o outou o le a afaina atu ai le matou Best Kept Secret”. Lau Afioa i le Fofoga Fetalai, o faigata na sa faafeagai ma tatou. A o lea ua taumafai taumafai lava o lea ua agai i luga le tamaoiga o Samoa aemaise foi le tulaga o Tagata Asiasi Maimoa Mai.

O le mea lea e mautinoa e tele tagata e fia asiasi mai ae i ai le faafitauli, le faafitauli tele lava e le lava mea e faaalu ai le taimi o le tagata i Samoa nei. O lona uiga afai e sau ae le lava ni mea faafiafia, e oo taeao toe lele ese ma Samoa, o ituaiga tagata na o le turisi lena a one day tourist e le aoga mo tatou.

E tatou te manao i le Turisi e sau atoa le vaiaso i Samoa nei o faaalu ai le tupe na sau ma ia ina ia mafai foi ona asiasi atu i Savaii. O le mafuaaga atoa lava lena lea e tele ai a tatou faatosina lea e fai. O lea na ala ai ona fai le Festival e faalauiloa ai a tatou tu ma aga e ala i siva, o taumafa o mea uma lava ia, e faaulelei ai ma le tatou atunuu, mama. Aua e omai tagata feoai o le tala lea e ave e pito i mama atu lava Samoa nai lo isi atunuu o le Pasefika. O mea ia tatou te taumafai e fai, ina ia faatosina mai ai tagata ma umi le taimi e nonofo ai i nei.

Lau Afioa i le Fofoga Fetalai, o le mafuaaga lena na fai ai le... na fuafua ai foi le Paka lea e i Aele. O o se fuafuaga e pei foi ona fai i isi atunuu, ia fai ai se faatoaga o laau eseese, flowers eseese. Afai e 30 ituaiga aute i Samoa aumai uma lava ituaiga aute eseese e toto i se vaega, vaega o le Paka. Afai foi e i ai laau manogi foi lea, lea e faaigoa o aitu o le po aumai laau manogi na e toto i i e faamanogi atoa ai le Paka. Ua seasea toe vaai se isi i le oli, aumai ma le oli pe afai o maua, e i ai le upu o le Maota Namuoli, aumai ma le asi e pei ona siosio ai o tatou fale.

O le falelauasi ona o le asi e manogi e toto uma ai laau manogi ia e tai pei ona fai i Niu Sila, Iapani ma isi atunuu e i ai a latou faatoaga laau faapena. A o atu la Turisi, e taia loa i le manogi eseese lea ma fai ni latou ala i totonu e feoai ai, feoai i ni taavale foi ia tai pei o taavale tapolo. E feoai ai i totonu ma le anoano o mau mea e mafai ona fai ai, e fai ai ma se artificial river i totonu e pei foi ona fai e isi atunuu. E maoae mafauauga, ma fai ai ma se faletele, a uma ona feoai tagata i i, ona omai lea nofonofo ma fai ai le latou kofe inu ai se fagupia na gaosi mai le SROS, aemaise lava la turisi ia e omai i vaa tetele ia e omai e tau leai ni mea e o i ai, e tumu pasi e talau uma tatou tagata ia i le 20 eka ua uma

ona fau faapitoa e i ai uma laau eseese i totonu. O mafaufauga na na ala ai ona faamaonia mai e le EU ina ua aumai le latou faafesili i le Pasefika pe i ai ni poloketi e fia fai? Ona avatu lea i ai o le poloketi lea. Na o Samoa na talia le Poloketi. E pei la o le tulaga lena e oo foi la i Savaii...

FOFOGA FETALAI: Toe tasi le minute o le sui usufono.

Susuga Hon TUILAEPA FATIALOFA AUELUA SAILELE MALIELEGAOI: I mea uma ia e faaulelei ai lo tatou atunuu.

Lau Afioga i le Fofoga Fetalai, ona ou oo mai lea i le Va i Fafo, le Matagaluega o le Va i Fafo. E i ai le tatou fetuunaiga na fai ma Malo i fafo e pei o Ausetalia, fau le latou fale i inei ae aumai e Ausetalia le tulaga e fau ai foi le tatou High Commission i Ausetalia. E toeitiiti atoa le 20 tausaga o tutu lava le fasifanua i Canberra e le i faia, e i ai mafuaaga. O le ala ua ala ai ona ou faafesili, ou te fia fesili atu i le tulaga o le 400 eka lea na tatou maua o faasalalau mai faatalanoaga a le Senate i Tutuila o lea ua to atu e le tatou Malo. E leai ma se isi o iloa lea mea. Ou te fia faafesili, se i aumaia se faamalamalamaga po o se tulaga faapea lea ua fai ina ia manino ai lo tatou atunuu, manino ai foi Amerika Samoa, manino ai foi Falealili o latou tuamaota ia.

E ala na taua ia te au le mea lea lau Afioga, e leaga ua leva ona faafeagai au ma pulufana i mea tau fanua, eleele o nuu e tuamaota i fanua nei. E le o se mea faigofie aemaise o se 400 eka e oo mai nei e leai se upu mai le Malo. O lea e fia iloa e Samoa atonu foi ma Falealili po o le a le 400 eka lea, o a tuutuuga na fai. E le tatau foi ona pogisa Amerika Samoa i le tulaga lea. O tatou uso, o tatou usu a Malo ae tatau ona manino, ua tele mea ia e faaletonu ua tulai mai ae le manino. Lau Afioga i le Fofoga Fetalai, o le a lava ai i i lau tamai agiagi se i faatali se isi ou avanoa i isi pepa ia e faasolo mai.

FOFOGA FETALAI: Malo faafetai. Ia tulai mai lau Afioga i le Taitaifono o le Komiti Tau le Tamaoaiga.

Afioga Aiono Tile Gafa: Lau Afioga i le Fofoga Fetalai faamolemole a na o si mea laitiiti lava pe maua se avanoa.

FOFOGA FETALAI: Ia tulai mai lau Afioga i le sui usufono mamalu mo Ana Alofi 2.

Afioga Aiono Tile Gafa: Sa fia tulai atu lava i le saunoaga a Vaimauga 1 ona o lea sa taua ai, e le fia ati foi se olo leaga o lea o lo o tofu Lipoti uma le Maota i sui usufono o le Komiti e le o Saini. Ioe. O lea e sau ai ma lenei sui usufono. A silasila lau Afioga i le Fofoga Fetalai ma le paia o le Maota i le Nu.3 i taualumaga o le galuega a le Komiti faatoa amata le iloilogaga a le Komiti i le aso 26 Iulai 2023, a o au na faatoa filifili le aso 24 Oketopa e le mafai ona ou saini pe afai ou te le i i ai i le talanoaina o le Lipoti.

E pei o le faamalamalamaga lena leaga o lea ua i ai faamaumauga a le Maota i saunoaga a le suiusufono. Ma le faaaloalo.

FOFOGA FETALAI: Malo faafetai ia...

Afioga Fuaava Suluimalo Amataga: Lau Afioga e aiga lelei lava le finagalo o le Afioga, o lea foi e maua e le o saina le sui uufono mo Aleipata Itupa i Luga. Ou te maitau o le taimi na tuuina mai ai Pepa a o tatou i ai i le malaga foi lea i Saina. O lea sa le mafai ai ona sainia le Lipoti i lea taimi ma le agaga faaaloalo.

FOFOGA FETALAI: Malo faafetai atonu o lea ua manino le sui usufono mamalu mo Vaimauga 1 pe ua manino?

Afioga Sulamanaia Fetaiai Tauiliili Tuivasa: Leai ou te tulai atu o le Lipoti lea e le o laua lea e i ai, e ese le Lipoti lea e tulai mai ai laua e i ai sui o le Komiti lea e i ai e i ai le Sui Taitaifono o lenei Komiti ia Lauofo, o Tea Peato ma Fuiono. E pei o le vaega lena lea e i ai le kopi lea. E pei e ese foi le isi Lipoti lena e te lua le saina ai ae ese foi le Lipoti lea ou te vaai atu e le o saina ai isi.

FOFOGA FETALAI: Ia, o le a tali atu le Taitaifono ona manino lea o lau Afioga i le sui usufono mamalu. Tulai mai lau Afioga i le Taitaifono o le Komiti o le Vaega Tau le Tamaoaiga i Lipoti e lua.

Afioga NIUAVA ETI L. MALOLO: Faafetai i lau Afioga i le Fofoga Fetalai mo le avanoa. E toafa latou sa tulai foi e tusa ma le Lipoti a lenei Komiti.

O le tulaga i le Paka lea i Atele ou te manatu o lea ua malamalama lelei le suanoaga foi a le Taitai o le Itu Agai i le tulaga foi na taoto i ai. E i ai le poloketi sa faataoto e le Pulega e fund ina ma le fesoasoani a le Malo. Peitai i le molimau foi a le Komiti ma le Matagaluega, ua le mafai e le Matagaluega ona ua faaletonu le tupe lea mai le Poloketi lea, a ua le mafai foi e le Matagaluega ona serve uma Paka ia ona o la e concentrate latou i le waterfront ma tua o fale o le Malo ua le mafai ai ona cater le Paka lea i Atele. O le ala la lena na toe talosaga ai ma toe tuuina i lalo, pasia foi e le Kapeneta i lena vaitau ma toe tuuina o le Paka lea i lalo o le Matagaluega o Faatoaga ma Faiga Faiva.

E masalo o lea ua manino le tulaga lea i le le saina foi, o lea foi e tau maitau atu e pei o le isi Komiti lea e le o saina ana sui, a o le Komiti lenei o lena lava e Saina. Ae afai e le i saina e moni le saunoaga foi a sui usufono mamalu o lo o malaga e tuua le atunuu, po o ua faataotolia foi i gasegase o le tino.

O le tulaga i le tasi lea fautuaga lea a le Komiti tulaga i le Pulega i le tulaga lea o mataaga. A silasila lau Afioga i le Fofoga Fetalai ma le mamalu o le Palemene, o le tele ia o mataaga i totonu o le atunuu. E pei foi ona saunoa le sui usuifono mo Vaimauga 1 e le o malamalama ai alo ma fanau o le tatou atunuu. O le faaitaiga o lau tala na fai i le Matagaluega e tai pei o Savaii i le mea lea sa faaliliu ai le Tusi Paia, tatou te fepasiai solo aga atu i sasae omai i sisifo i luma o le mea na faaliliu ai le Tusi Paia a o i o lo o i ai le fatu lea na mafua ai ona tatou iloa faitau i le Gagana Samoa lea e taoto ai i i. Ae le o mafai ona i ai ni faailoilo e iloa ai e alo ma fanau o le atunuu o i tonu na faaliliu ai le Afioga Paia a le Atua, ina ua sulugia Samoa i Lona malamalama.

Ia, e tai pei foi la o le Papa o le Faatolotologatama, o le Papa i Galagala e moni ona o la ua tumatie ona ua i ai le aoga ae oo foi i le mea na faamavae ai na ave

ai o tatou tagata e faaunuua, se mea o vaitafe i i le talafatai, o le fautuaga na ave i ai aumai ni nai statue foi na e o lea ua i ai tatou Artist o lo o i le atunuu aumai e faatutu ai i ia iloa e alo ma fanau o le atunuu o i na faamavae ai Samoa e faaunuua atu ona tagata ma mau ai pea i o latou fatu. O le mea lea e taumafai atu le vaega lea ina ia mafai ona pasi le information i te i ua uma atu le tatou augatupulaga ma generation ma tatou o ma le information lea ae sa tatau ona pasi. E faafefea ona pasi? E tilotilo tamaiti i statues ia, o le mea na i ai le toeaina o Malietoa, tulou foi tupu o le atunuu. O mea na i ai talaaga o le atunuu na mafua ai, pei o le ala lena o le fautuaga. O la e ua taoto i le Afioga foi ia Toleafoa ma le paia o le Matagaluega le fautuaga e fesoasoani foi i le latou galuega e faalauiloa ai Samoa ma lona atunuu. Aua e taunuu loa le meli e pau lava le mea e o i ai e o i gauta i le Museum ma o i gauta i le mea o lo o taoto ai le toeaina o Stevenson. Ae pei o isi nai talaaga ia o le atunuu e taua o le mea lena na ave ai le fautuaga a le Matagaluega.

O le fautuaga i le Immigration lau Afioga o se taimi ona tali foi lea o le Afioga i le Minisita o lo o feagai ai, ae manaia tele le fautuaga a le Afioga. E masalo o lea ua... lau Afioga i le Taitai o le Itu Agai o le tulaga lea i le fanua foi lea e pei ona e saunoa ai, masalo o lo o i le Afioga i le Tamaitai Palemia, se taimi, ona e le o i totonu o le Lipoti lea le... masalo se taimi ona talifuitau lea o le Afioga i le Tamaitai Palemia o ia tonu e agai i ai le mataupu e pei ona fesiligia.

E pei o se talifuitau atu lea lau Afioga i le Fofoga Fetalai. Manuia le Fonousu.

FOFOGA FETALAI: Malo faafetai. Tulai mai lau Afioga i le Taitaifono o le Komiti o Tulafono Tumau ma Mataupu tau Faiga Palota.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, o si mea laitiiti...

FOFOGA FETALAI: Ia malie lau Afioga i le Taitaifono se i tulai mai lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: Se faamolemole lava po o le a tonu le tulaga i sou finagalo i Lipoti nei e le o saina atoa ai sui usufono o le Komiti, e lelei lava ona faamanino mai totonu o a latou Lipoti po o le a le mafuaaga o le lē saina? Leaga a aumai se Lipoti i totonu i i ae i ai ni feeseeseaiga e tatau ona malamalama le Maota lena i le mafuaaga o le lē saina.

FOFOGA FETALAI: Ua lelei o lea ua maua le finagalo faaalua. Tulai mai lau Afioga i le Tamaitai Palemia.

Afioga Hon Fiamē Naomi Mataafa: Lau Afioga i le Fofoga Fetalai, a o tatou see i mataupu o le faatulagaina o le faaofi mai o tatou Lipoti e pei ona tulai mai le Taitai o le Itu Agai, e pei e lelei foi ona manino ona faataatia felafolafoaiga i luga o Lipoti. E fai ma faataitaiga o le tatou felafolafoaiga i luga o le Tala o le Tupe faalauaitele ma faiga faavae a le Malo.

Ae a maitau e lau Afioga ma le Maota o le tele o Lipoti nei e talanoa agai i le faatinoga o galuega a Matagaluega - Operational.

O lea o lou maitau atu muamua e faalauaitetele atu saunoaga e ese mai mataupu o lea e aumai Lipoti. Lona lua o lea foi tatou te talanoa agai i faiga faavae, atonu e le afaina lea aua so o se mea e i ai lava ona faiga faavae. Ae tau ina manino i le fai o felafolafoaiga i luga o Lipoti aua o lo o i ai le Lipoti o Fautuaga a le Komiti ma Tali a le Malo. Ae pei e lauaitetele atu e fai ai la ma faataitaiga le mataupu lea e fesili mai ai le Taitai o le Itu Agai i le 400 eka o la e saunoa mai le Taitaifono e le o i ai i totonu o le Lipoti. Ae se i ou tali puupuu atu ia, ou te le iloa foi e au ia lena mea.

FOFOGA FETALAI: Ia e taua foi le fetuunaiga a le Afioga i le Palemia ma le Taitai o le Itu Agai.

Susuga Hon Tuilaepa Fatialofa Auelua Sailele Malielegaoui: Lau Afioga i le Fofoga Fetalai ua ou malie i le tali ua aumai.

FOFOGA FETALAI: E taua foi le saunoaga a le Tamaitai Palemia e faatonufofua ai le tatou talanoaga i tatou Lipoti ona o lo o tuuavana atu lava le Nofoa e o faatasi lava faiga faavae ma fautuaga, aepetai, e aoga foi le fautuaga ua tuuina mai ina ia agai sao pea outou finagalo ma tatou fautuaga i tatou Lipoti e faigofie ai le tatou galuega. Atonu o lea ua manino mai le saunoaga a le Taitai o le Malo lea foi ua aumai le fautuaga o lea foi ua aumai le tali o le mataupu lea sa laga e le Taitai o le Itu Agai. E i ai se mea lau Afioga i le Tamaitai Palemia?

Afioga Hon Toeolesulusulu Cedric Pose Salesa Schuster (Minisita mo Punaoa Faalenatura ma le Siosiomaga): Lau Afioga i le Fofoga Fetalai...

FOFOGA FETALAI: Oi le saina a le Komiti. O lea e fia maua tonu, se i tulai mai lau Afioga, e pei lava o le Komiti lea e i ai le tulaga lea. Se i saunoa le Taitaifono ona malamalama ai foi lea o le Nofoa ma le tatou Maota. Tulai mai lau Afioga i le Taitaifono.

Afioga AUUAPAAU MULIPOLA ALOITAFUA MULIPOLA: Faafetai i lau Afioga i le Fofoga Fetalai. E manatu i Lipoti ia e 3 a le matou Komiti, e tasi le Lipoti na faaalua ai le finagalo e toatasi foi le sui usufono sa faaali lona finagalo, ae faapitoa i le Lipoti lea i le Matagaluega a le Palemia seiavagana ai foi le tuualalo a le Afioga i le Taitai o le Itu Agai o le a faasolosolo atu i ai le tali.

Na laga e le Afioga i le sui usufono mamalu mai le Vaimauga 1 le vaega o le lē saina uma o le Komiti i le Lipoti. E lelei ona ou faamanino atu le tulaga lea. O le vaega muamua o lo o i ai le Sui Taitaifono sa umia e le Tofa i le Igoamatua ia Ale o lo o i ai le Lipoti o lena e saina. E pei ona outou silafia o le taimi lea faatoa amata le Lipoti o lo o Sui Taitai ai le Tofa i le Igoamatua ia Ale o lena e saina.

Ona faasolo mai ai lea i le Tofa Tea Tooala Peato tasi lea sui usufono o le Komiti e le o saini, o le taimi lea na oo mai ai le tusi ia te au, o au o le Sui Taitaifono o le Komisi Faa-Palemene a o le Taitaifono ua faamavae na ave foi ma faaaauu agai i le Fofoga Fetalai o le Taitaifono o le Komisi. O lea o le lē saini o le Tofa Tea le Afioga i le Tama Matua le Afioga i le sui usufono mamalu ona o le mafuaaga o le taimi tonu lea na faamavae mai ai ma ua talia le faamavaega.

O lea la ua sui ai le taimi i le tuanai mai o le Lipoti, o lea ua faaaauu e le Tofa Foisala le matou nonofo ai. E pei foi la ona i ai le taimi lea le Tofa ia Fuiono Tenina e faamalulu atu sa faatafagasegase le sui usufono i le tulaga lea. O le Tofa Hon Lauofo e le o Saini i le Lipoti sa feagai ma malaga faale-Malo i le vaitaimi lea. Ma le fesuiaiga o lo o tumau ai nei o lea ua see atu le Susuga ia Maulolo Tavita Amosa e fai ma o matou Sui Taitaifono filifilia.

E pei foi ona matou galulue ma le Afioga ia Hon Loau Solamalemalo lea ua sui ai se tasi o le Komiti Susuga ia Aiono o se tasi o Laau na Fausia. O le faamalamlamaga lea o le lē saini o isi o le Komiti ma le fesuiaiga sa fai e le Komisi, ae i le tulaga i le Fautuaga le Nu 02 o la matou...

Afioga Sulamanaia Fetaiai Tauiiili Tuivasa: Lau Afioga i le Fofoga Fetalai ona e taua tele...

FOFOGA FETALAI: Malie lau Afioga i le Taitaifono se i tulai mai pe... E le i faamalieina lou finagalo?

Afioga Sulamanaia Fetaiai Tauiiili Tuivasa: E leai o le agaga aemaise o le Sui Fofoga Fetalai o le taimi lava lea sa tulai ai e faamanino sa tatau ona aumai ai le folasaga lea, leaga e maitau uma e le Palemene sa tatau ona aumai i lana folasaga mafuaaga e ala ai ona le saini isi, a o lea faatoa tu ona ua laga atu. E pei o le faanoanoaga lena. E i ai foi le manatu o lenei Komiti o lea foi e pei e fou i le faalogologo a nei sui usufono mamalu nisi ua sui ae tailo pe a, ae i ai lota ita vaivaiga o le Palemene lava lenei e fofoga ai o ai e ua tofia i lea Komiti ma lea Komiti.

Ae pei la e faateia i lenei taeao o lea ua i ai suiga a le Sui Fofoga Fetalai, e pei o le faanoanoaga lena a o lea lava e manino.

FOFOGA FETALAI: O lea ua manino le finagalo o le sui usufono. Ua e silafia foi o lea ua le toe tolaulauina ni tatou fautuaga ma ni... o lea ua tuu atu lava tou te faitauina ae faafetai mo le fautuaga o lea ua maua o lea foi ua faafogafoga mai Taitaifono mo Komiti Taitasi e taua foi mo le agai i le lumanai. Ae tulai mai lau Afioga i le Taitaifono e faaaauu le saunoaga.

Afioga AUUAPAAU MULIPOLA ALOITAFUA MULIPOLA: Faafetai i le Afioga i le sui usufono mamalu. E leai o na e i ai le tatou Tulafono Tumau le 66, a saini lava le majority o le Komiti o le tali lena, ae a faapea e fia faamanino le tulaga o le lē saini a lea ua tali au le Taitaifono. Lea ua tali a o le tali o le vaega e pei ona e saunoa i ai lena e i le Vaega 66 o le Tulafono Tumau, faitau

lelei ai ma ia manino. O le mea foi lena e le o i ai se footnote o alu atu i lalo aua a laga la e pei o lou finagalo o lea ua tali manino au o le Taitaifono. E ui o lea see ese o lena ua malamalama lou finagalo.

O le vaega 2 o le Fautuaga sa tuuina mai o le tatou...

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai e le logomalie saunoaga ia. E pei ona ou fai atu sa tatau la na fai ni ana footnote i lalo o ana Lipoti ia e tufa mai le Maota lena e tau mai ai le le saina leaga e naunau tele le sui usufono lena i lau Saina, o lau saina ua e ioeina ma ua e amanaiaina ma ua tuu lou faatuatuga, a e le saina ona masalosalo lea e te le o lagolagoina le Lipoti ae ua talia le agaga o le faafetai i lau Afioga i le Fofoga Fetalai.

FOFOGA FETALAI: E aoga foi mea e lagalaga ma tutupu tatou te mafaufau atili ai mo le lumanai, ae faafetai mo fautuaga o lea ua taatia mai o le a vaavaai ai pea i ai mo le agai i le lumanai.

Tulai mai lau Afioga i le Taitaifono, agai loa i le tou Lipoti lau Afioga i le Taitaifono.

Afioga AUUAPAAU MULIPOLA ALOITAFUA MULIPOLA: Malo faafetai. Ia ou te tali atu lava o le Tulafono Tumau e tatai i ai galuega a le tatou Maota.

O le Fautuaga e 2. Faafetai i le fautuaga a le sui usufono mamalu mo le Vaimauga 1, o le tulaga lena lea e alu atu ai le fautuaga ina ia mafai ona teuteuina pea le tatou gagana ma le gagana faa-Peretania aua tatou declaration form, arrival form ma le departure form aemaise o tatou tagata femalagaai e le malamalama i le gagana faa-Peretania.

A o le tulaga latou ia o le fautuaga lea e tuu atu ma le isi vaega la e avatu ai le fautuaga e pei ua fai tele sina mataninii tele o faamatalaga la e i luga o le pepa. Afai o faafofoga mai le Matagaluega o vaega na lea na tapena ai le fautuaga mo le agai i luma.

A o nisi o vaega uma e faafetai ona e leai ni finagalo na laga i nisi o Lipoti e 2 a lena Komiti Faa-Palemene. E ui i lea e momoli foi le faafetai i le matou Komiti e ui e le o auai i nei nisi a o le agaga a lena e tasi. Sa matou saili i sailiiliga ma fautuaga ina ia mapo ai le tuuina atu ai o le Lipoti aua le finagalo faaalua o le tatou Palemene.

O le faaiuga lea o le Lipoti ma le fautuaga a le Komiti ua tuuina atu i le Palemene e ui ina toatasi le sui usufono na faaalua le finagalo a o le agaga faafetai foi ua outou talia isi Lipoti e 2 a le Komiti. Ma le agaga faafetai, faafetai lau Afioga i le Fofoga Fetalai.

FOFOGA FETALAI: Malo faafetai saunoa lau Afioga i le Taitaifono. O lea ua maitau atu pei ua, ia saunoa lau Afioga i le Tamaitai Palemia.

Afioga Hon FIAME NAOMI MATAAFA: Faafetai lau Afioga mo le avanoa. E maitau ma le totoa nisi foi o mau na aumai i saunoaga a sui usufono

i luga o le tatou Lipoti lea tatou te felafolafoai i ai. E pei e lilifa finagalo faaalua i le tatou Matagaluega lea Tagata Tafafao mai, o nai fautuaga mo le Ofisa le Va i Fafu faapea foi le Ofisa o le Palemia ma le Kapeneta. Ou te manatu lau Afioga i le Fofoga Fetalai o lea lava ua manino le taatiaga o fautuaga ma tali.

O lea foi ua saunua Taitaifono ua saunua i le atoaga o mataupu na laga mai e tusa ai ma le taatitia ai o fautuaga ma Tali a le Malo. Ae na ona ou fia faapupula atili i le mataupu sa laga mai e le Taitai o le Itu Agai, ai foi e maua i mea foi ia o fake news le tulaga lea i le 400 eka, na o le pau lava ia o tatou fanua faafesuiai pea ma tatou uso i Amerika Samoa o lo o i ai le fanua i Tafuna mo le tatou Ofisa. Ma o lea ua faamatu le fanua i Moataa mo Amerika Samoa. E i ai le faaopopoga o lea ua feutagai nei i ai ina ia maua se avanoa e latalata i le uafu i Tutuila e tuu ai se fale teuolua pe a e fesoasoani i le fealuai atu o le tatou vaa i le va o motu e lua. O lona uiga la o le a lua fanua a tatou i Amerika Samoa ma lea la ua fuafua i ai i sina faaopoopoga laitiiti i Moataa e faatutusa ai ia fanua ia mo galuega faale-Malo.

O sa matou tali atu lea ma le faaaloalo manuia le fonu.

FOFOGA FETALAI: Tulai mai lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoui: Lau Afioga i le Fofoga Fetalai, na pau lava le mea lea ua malamalama le saunoaga a le Palemia, e le o se fake news lea sa ou talanoa atu ai. Na ou faalogologo i felafolafoaiga a le Senate o taua ai mea ia ae afai la o le fake news a le Senate e le o se fake news a au, o felafolafoaiga a le Malo o Tutuila lea ou te talanoa ai ua uma le faamatalaga o la ua i ai le 400 eka o le latou faatoaga.

FOFOGA FETALAI: Malo faafetai. Atonu o lea ua manino lea vaega, tulai mai lau Afioga i le Taitaifono.

Afioga NIUAVA ETI L. MALOLO: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le:*

- 1. P.P 2022/2023 Nu 112, Lipoti a le Komiti o le Vaega Tau Tamaoaiga i le P.P.2020/2021 Nu.66 ma le P.P.2022/2023 Nu.31, Lipoti Faaletausaga a le Pulega o Tagata Tafafao Maimoa mai Fafu a Samoa mo le Tausaga Faaletupe 2019/2020 ma le 2020/2021 ma le*
- 2. P.P.2022/2023 Nu.113, Lipoti a le Komiti o le Vaega Tau le Tamaoaiga i le P.P.2022/2023 Nu.42, Lipoti Faaletausaga a le Matagaluega o Mataupu Tau le Va i Fafu ma Fefaataiuiga mo le Tausaga Faaletupe 2020/2021.*

Faaluaia e le sui usufono mo Satupaitea ma le sui usufono mo Aleipata Itupa i Luga.

Na faamaonia le lafo.

FOFOGA FETALAI: Ou te tapa lau Afioga i le Taitaifono o le Komiti o Tulafono Tumau.

Afioga AUUAPAAU MULIPOLA ALOITAFUA MULIPOLA: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le:*

1. *P.P.2022/2023 Nu.98, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2020/2021 Nu.70 ma le P.P.2021/2022 Nu.48, Lipoti Faaletausaga a le Matagaluega a le Palemia ma le Kapeneta mo le Tausaga Faaletupe 2019/2020 ma le 2020/2021; ma le*
2. *P.P.2022/2023 Nu.46, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2020/2021 Nu.136 ma le P.P.2021/2022 Nu.39, Lipoti Faaletausaga a le Ofisa o le Komesina o Sulufaiga mo Tausaga Faaletupe 2019/2020 ma le 2020/2021; ma le*
3. *P.P.2023/2024 Nu.86, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.12, Lipoti Faaletausaga a le Komisi o Galuega a le Malo mo le Tausaga Faaletupe 2021/2022.*

Faaluaina e le sui usufono mo Vaisigano 1 ma le sui usufono mo Gagaifomauga 2.

Na faamaonia le lafo.

FOFOGA FETALAI: Ou te tapa lau Afioga i le Tamaitai Palemia.

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa Tali a le Malo i Fautuaga a le Komiti o le Vaega Tau le Tamaoaiga ma le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae.*

Faaluaina e le Sui Palemia ma le Minisita mo Faatoaga ma Faiga Faiva.

Na faamaonia le lafo.

FOFOGA FETALAI: E momoli atu le faafetai tele i le paia o le tatou Palemene e ui lava ua i ai nai minute ua sili ae i ai le manatu o le Nofoa o lea ua taua o lea ua faamaea ai tatou Lipoti e 13. O le mea lea o le agaga faafetai o le Fofoga Fetalai malo le galulue malo le usufono.

Faamalo faafetai le lavapapale o le tatou Maota i enei lava aso o lea ua tatou taunuu mai i le tatou taimi manava faamalo le onosai, aemaise foi sui usufono mamalu sa sausaunoa. Faafetai foi i a outou Afioga i Minisita o le Kapeneta ma lau Afioga i le Palemia mo le pitolaau o le tatou Pulega Faatonu e tusa o tali manino i fautuaga a tatou Komiti ma mataupu sa laga e sui usufono mamalu. O a ni tuataafalu o lenei aso ia taoto ia iinei tatou

taape ma le finagalo fefaamagaloai, o le naunautaiga ia faatini ma le manuia le tatou folauga i lenei Paeaiga ma ia maua se ai o le tapuai mai o le atunuu.

O a ni galuega ua mafai ona fai i lenei aso ia fai ma Viiga o le Atua malo le usufono malo foi le tautai a'e, malo fai o le faiva tatou talosia i le alofa o le Atua le aso a taeao.

Faafetai i Ofisa Sili o Pulega o Matagaluega ma Faalapotopotoga Tumaoti o le tatou Malo i la outou tapuaiga ma le lagolagosua i taualumaga faaauau a le Palemene malo faafetai, saga faamanuia le Atua i lo outou alofaiva aua lava lo tatou Malo ma le tatou Palemene.

Samoa ma lau tapuaiga malo faafetai. Afai ua sipa se lamaga i lau faafofoga i lenei aso, e asuasua atu vaimalu i aai o finagalo faamagalo se aleu a lau Palemene i se gagana ua le tau tamalii. A o le tatalo ia tumau pea le agalelei o le Atua i so o se tafa o le tatou atunuu.

Ae tatou te le i tolopo ou te talosaga atu i le sui usufono tamaitai mo Alataua i Sisifo e saunia se tatou tatalo.

Na tolopo Taualumaga a le Fono Aoao Faitulafono i le itula e 1:11 i le aoauli seia aulia le Aso Tofi, 14 o Mati 2024 i le itula e 9.30 i le taeao.